


AHEPERI, EKAPIITULU YA NEERARU

 Mooxeleliwa, apatthani. Oreeriwa okhala va voosiis'ula wo waakokhorela Apwiya. Ni ninniwehererya ni ororomela okathi wooreera.

² Kinoomalaru okhala ottuli iwe o...ele niihanak'ahu oskritooriyu wa matiyaakono, weiwo siri ikaravatooro vano, nto kaalavula ni mwali mmosa n'ame awe ottuli iwe, a oJoliet, Illinois. Nto kaamuupuwela paahi muhokorokho zeeni wa mahala a Muluku mwali ule sikhany'awe. Anci-ene a hiyo va ninnimusuwela owo. Owo aari na—namuhapaliwa a mwale, mmosa a enamuna yootepa. Ni nkaamusuwela saana wahala ene mpakha voosiis'ula, waari okathi waakhumaly'awe vaplataforma. Apwiya yaahimuupululela sothene saavonyeiyi ni etthu yaarowa okhumelela. Vano owo aahikhuruwa vaplataforma, anlaka ni atthapaka okhala wira Muluku aahimoopola mma—mmahiyeni mwa namuhapaliwa. Vano owo. . . Muhano mmosa khimurrowela khupacerya wunla, wira mwan'awe, kookupali wira aari yoowo, aari oopahuwa wa soohapala. Nto moosuwela, ni mahala a Muluku, mwali ule aahiihaniwa (kookupali, waari ohiyu woottharelana, Rosella, aahiihaniwa?), nto mwali uwo, oovonihiwa, wa soohapala iyo. Vano owo n'aiy'awe anlaleyasa Ehapari yooreera. Nto—nto—nto omoona mwali mmosa oophenteya ntoko Rosella, oottokottha saana! Nto vano owo, oottittimiheya saana, owo ookhalana e. . . onnoona wiihaniwa mmurimani mwawe. Masi, omusuwela Bibilia mwaha w'athiyana alaleyi, moone, owo oosuwela wira etthu ekina. Ni Muluku onnimweettiherya mukhatteya ni itthu, wira akhaleleke onamoona.

³ Eyo ti yooreerexa o—o—osuwela, ophavela otthuna wa Muluku. Imaara sikina hiyo ninnikhalana moonelo, masi ninthuna okuxa moonelo yoowo niroiha mapuro; mwaahiwehe vale, xetwani onookuxa moonelo owo ahonone okhale etthu. Masi vakhalaru wira ninkhala mBibiliani, nto niri saana, moone, nineetta nirowaka n'utthuna w'Apwiya.

⁴ Nto siiso kookupali wira—wira Rosella vookiserya onookela mmapuwani mwa omisiyonaariyu nipuro nlo, okhala wira Amerika khonthuna Ehapari yooreera.

Nyuwo munnisuwela eyo. Vanreerela hiyo okupali iyo, wira, atthu ala a Anklo-Saksoni aamalamala. Ti yeeyo tu. Kiiivo-tho Ehapari yooreera Amerika onrow'awe waakhela. Oh, munoophwanya kamosa-kamosa vakhani, imaara kamosa-

kamosa. Masi, vanihimya Ehapari yooreera, yoomala. Khamunwerya hata waalaleerya, khivanweryaneya olavula n'awo. Awo khanrowa waamini hat'etthu. Munnona? Awo arina ankhili aya paahi oothipelela, ni t'olipiherya.

Nto itthu sinttharelana sa elapo ela olamuliwa. Eyo enoorowa okhalana, nave. Pooti okhala mwa ethowelo musurukhu. Pooti okhala mwa ekapwitthi y'atomu. Pooti okhala ehasara yuulupale, eretta wala etthu, masi, yoolikana. Enimoorwa. Ikonto vaara ikonto sene anoomora.

⁵ Hiyo naahivira, nsana, Munna Zabel ni miyo, o...ni Munna Wood, nikhumaka oKentucky, weiwo waakhanly'ahu-wo mahiku mararu, nto khuvira nipuro nintekiwa mampa. Munna Zabel khwira, "Khiivo . . ." Kinooliyala. "Enkhala ntoko khaavo hata mmosa w'atthu ale, mwa etthokiheryo ele, onrowa hata ekereja emosa."

⁶ Mwaakoha vale yeeyo. "Ahe, nihaana etelevisawu ahu. Ti siiso omphwanyaahu ohakalala." Munnona? Owo ti mweettelo wa Amerika. Munnona? "Nihaana etelevisawu. Nihaana musurukhu munci-ene. Nihaana ikaaro sooreera, nihaana mampa ooreera. Exeeni nimphavel'ahu n'Apwiya? Hiyo khanimphavela Eyo." Owo ti mweettelo.

⁷ Etiini emosa paahi ni woopoliwa orin'ahu, ni ophenta, ori eriyari y'atthu ooreera murima vekeekhai. Moosuwela, Bibilia ohimnye wira yaamwiiraneya. [Muthukumano oniira, "Amen."—Mol.] Uh-huh. Nyuwo munimusoma Bibilia, koowiiwani okhuwela "Amen," ni nyuwo alaleyi ottuli iwo. Wira, eyo ekeekhaii. Ophenta waarowa okhala ottaiwene, mahiku ookiserya; ophenta paahi waarowa ohala, waarowa okhala eriyari y'atthu Oothanliwa a Muluku. "Tiithi aamurowa owana ni maama, ni maama owana ni tiithi, ni anamwane owana n'axitiithi, ni oohiyana-hiyana mmosa owanaka ni mukhw'awe." Nto ophenta paahi waarowa ohala, waarowa okhala owo Oothanliwa, ale Oothanliwa paahi. Nuulumo "Oothanliwa" vo ninrwa mwa nuulumo "Oothanliwa," Atthu oothanliwa a Muluku.

⁸ Okathi Rosella aakitharihel'awe wahala ene musaala, okathi vakhani ovinre, miyo kaamuupuwela paahi, wira, ohiyu uwo, owo aahihimya wira yaahikhumelela etthu. Ni moota eyo, yaahimaly'aya, makhalelo awe othene, vaavo owo aakhanly'awe na, namuhapaliwa a mwale paahi, khaawerya, hata mutthenkeso Anamuhapaliwa Oohisuweliwa, matothoro axexe yaahimuhiya oohiroromela, khiivo yaaweryaneya wiiriwa, ni moota, okhuma okathi yoowo, etthu emosa yaakhumelenly'aya.

⁹ Vano owo kahiyo mulolo yoowo. Owo mwali mmosa, oophenteya ooreera a miyaakha miloko miraru ni miraru, ni aamukhala ntoko a miyaakha miloko miili ni miili; moota Muluku omwiirenly'awe ele Owo iiraly'awe, ni moota

onooney'awe okhala oovirikana. Ni, masi miyo khwira, "Rosella, ohinatthi opattuxiwa olumwenku, Muluku aahitthomela okathi ule." Ayo, mulopwana. Munnona? Khweeli. Nto okathi Billy Paul mwaamukhaani ottuli iwe, weiwo ory'awe, aakawel'awe ittikitti sa mavekelo atthu ohiyu yoowo, owo khaasuwela ti pani aamuvah'awe ettikitti ya mavekelo.

Kahi yooreerexa, Rosella?

[Munna Rosella Griffith oniira, "Munna Branham, kaatthuna kisuwele sinto ekereja yaamuwerya ovekela wira Muluku anihooolele, moota Owo aary'awe a ikuru."—Mol.]

Amen. Apwiya yooreeriheni, Rosella. Kookupali wira nnimwiira yeeyo. Owo onttthuna wira ekereja evekele wira Muluku amuhooolele. Eyo ti wi, otthara ntata Nawe nihinrukunuwa. Oh, eyo ti yooreera saana.

¹⁰ Kooleeliheriwa nthoonyeryo woothukumeliha murima, voosiis'ula. Mwaha wa namusurukhu mmosa, ooraala vanci-ene imaara imaara sene onttthuna ohelela muhakhu oLouisville nno, Kentucky, ni okitekela etapernakulu ya itoolare imilyawu thanu. Masi etthu emosa vathi mmurimani mwaka khwira, "Nwehererye, nyuwo khamuhiyo mwa pastore." Munnona? Vano, nto, musurukhu itoolare imilyawu thanu waarowa ophwanelela. Vano okhalaka oorowa wa kuv eerunu, wira aliveriwe wiskhi ni itthu ntoko seiyo, masi onttthuna ohelela etapernakulu ya Apwiya. Masi kinroromela wira onoorowa wa murumeyi a Muluku onrowa...ni muteko wa Muluku. Masi, iyo itoolare imilyawu thanu soophwanelela vano. Nkuupuwelani yeeyo, etapernakulu xeeni yaarowa opakiwa ni yoowo.

Munnoona moota enooney'aya okhala yoosivela, Rosella? Masi yookhala etthu muhina *mu* enihimya voovirikana. Munnona? Munnona? Etthu emosa muhina *mu*.

¹¹ Hiyo ninoorwa etapernakulu ila, yaamukhaani ya khalayi, nyuwo aletto. Ahe, nla naamuwerya okhala nipuro n'okuxa murima onloothoni nno, nyuwo khamunsuwela wira, wira atthu yaanittthuna oteka nipuro nla n'upaka. Masi ela t'inamuna ennisivela. Moone, ela t'inamuna ennisivela. Ikhukulu sa khalayi saakilaathiki-ahu iwe, saari i—ikhukulu sa khalayi soopacerya sa otapernakulu va, saasamme mmaasini khuphempa.

¹² Bibilia aka ory'ene ookhunliwa *saale* vapulpitu. Aahipharelela epatho khutthikela okhuruwa ni Masu mwa Vaavo, "Miy o Apwiya kihaala. Kinoonaaniha othana n'uhiyu ohikhale onikumihha mmatatani mwAka." Naahivura ikaafi vasulu vaya ni nikula, *va*. Vano owo khukhuruwa-tho, ikhukulu khutthikela nipuro naya. Yaahaana ottikittha paahi n'ukelela ohoolo. Munnona? Munnona? Tivo ela t'inamuna paahi ennisivel'aya, vaavo ankhala atthu pure, nipuro pure, ni Apwiya ootepa oreera. Amen.

13 Vano, olelo, nihaana kamosa-kamosa, hiyo ninoopacerya paahi okela mukereemeni, moosuwela, numala e—eleethi okumihwa yothene, nto ekeremi paahi. Nto muupuwele, entthuneya eleethi wira epakiwe ekereemi, moosuwela. E—ekereemi ti yookhala-mo ya eleethi.

14 Vano naakhanly’ahu mwa yoo1, yoo2, nto nimmalela mwa yoo3, ni opacerya kapiitulu 4 ya Eliivuru yoovuwa y’aHeperi. Nto, oh, ixuttiheryo sa Eliivuru ila! Naamuwerya okhala ni Yeela mwa, eversiikulu emosa, mwa miyeeri miraru, ni wooniherya paahi wira Eliivuru yothene envarana ni khula eversiikulu mBibiliani. Mootoko wupuwele yeeyo? Khiivo hata eversiikulu emosa mukhanly’anyu othoonya, yeeyo, ni mahala ni mukhaliheryo wa Eroho Yowarya, nihikhanly’ahu ovaranihaka okhuma Maphattuwelo mpakha Wiisuupulula Memmo.

15 Khiivo hata eliivuru ekina elempwe nipuro pi nipuro enwerya wira yeeyo. Ni matemaatika, ni xeyokrafiya, mwa inamuna sothene, khiivo Eliivuru mBibiliani elempwe ntoko Bibilia. . .Khiivo eliivuru mulaponi, kinihim’yaka, elempwe ntoko Bibilia. Khiivo hat’etthu. Mammeru a Bibilia ari oolikana oratte-ene; hata ikapiitulu, ni imaleliheryo, ni sothene, ti soolikana. Khiivo hata eliivuru ekina; khimwaawerya osoma ekapiitulu emosa muhiivirikannye mwaatthikelaka. Masi khuuvo hata ovirikana omosa mBibiliani mothene. Ni olempwe n’atthu, anci-ene, anci-ene, anci-ene; ni miyaakha, ni imiya, imiya sene soohiyana, ehisuwelaka hata nipuro nimosa. . . Mmosa omulempe *va*, nto mmosa khimulepa *va*, ni mmosa khimulepa *va*. Okathi Eyo etakanxiw’aya vamosa, okhumme Bibilia a Muluku. Ni khaavo hata mmosa ommuvirikanya mukina, ni, nnakhala, matemaatika, xeyokrafiya. Etthu p’itthu ekina ya mBibiliani, sothene sineetta vamosa voolikana. Vakhala wira owo kuhiyo oowuupuxeriwa, nkisuwenle, exeeni enrow’anyu wiihana muupuxeryo? Miyo kinnitthapa, mwaha wa Bibilia ooreerihwa a khalayi.

16 Atthu kamosa-kamosa yiirale, “Nyuwo mwa muKatolika? Prustante?”

Miyo khwira, “Hata mmosa. Miyo kinimwaamini Bibilia.” Ti yeeyo. Kinimwaamini Bibilia, ni kinnitteeliwa murima okhala wira nookhalana otaphuwa wo omulaleya Yoowo elapo ela. Oh, Ti yoooreerexa.

17 Vano ninrowa omusoma Yoowo. Nto vano ninrowa okhunla Eliivuru y’aHeperi nipacerye kapiitulu 3. Ni naahiyerenrye versiikulu 15. Nto vano nyuwo othene. . .

18 Koomoona mutthu owehaweha, okathi vakhani ovinre, okathi okuxaly’aka ilumeta saka s’osoma-no. Kahi wira maitho aka aroohikhala saana, masi kooviriha miyaakha miloko mixexe. Kinniwerya osoma, *vaava* va, voolikana, masi kinwerya osoma oraatta-ene ni ilumeta. Ni koopakeliwa ilumeta s’osoma-

no kintthun'aka owara okhala wira kinniwerya osoma orattanexa ni vovaakuvaxa. Nto mwaha wa yeeyo kikhalanenly'aka. Vano mwa . . .

¹⁹ Yoopacerya, nintthuna mulipiheryo mwaamukhaani, okhala wira siiso akhanle-ene aletto eriyari ahu, ahiphwannye epantte yoopacerya ya Eliivuru y'aHeperi.

²⁰ Nyuwo mwa Muhano Cox, mukilanthé nno wookiseryani? Ahe, kootthapela saana omoona. Kihinatthi opacerya, ntoko onamoona wa mahala a Muluku. Aahikhala muthiyana va aarina kankuru aamukhuura wiitho. Owo ti mai a Munna Wood muthiyana. Nto miyo kaari oMichigan ni Gene ni Leo, n'akina, nipakaka ikaravasawu. Vano mphironi nirowaka owaani, amwaar'aka khukiihana, ahiiso miyo khuwiihana. Awo khwira, "Murowe naanaano mwanvekelele Muhano Cox, mai a Muhano Wood, mwaha wa kankuru onimukhuura wiitho." Orookela epantte ya muhina mwa niitho khukhuruwa mpakha mmakhuvani, khukhalihá wiitho wawe wowaataleleya, ni onoomwaramwareya tu. Tothoro mmosa aahimwiiriha etthu, oroomutepiha paahi, nto khumwaramwareya; khuhela muthinto mmosa wa murette vaavo.

²¹ Vano khukuxiwa okhuma oCampbellsville, Kentucky, mpakha o . . . ahiiso, kookupali, Acton, Kentucky, mpakha o—oLouisville, wira alooliwe.

²² Vano nto Muhano Wood, emaara yoopacerya kitonko aka omoona aari ooriipiwa murima. Okhala wira, vekeekhai, t'a—t'a—t'ame awe, ni vekeekhai owo aamuriipiwa murima. Kaahivolowa mpaani khunvekelele, kiroromelaka wira Muluku ohimnye wira Owo aamwaakhula mavekelo. Mahiku vakhani, awo yaahikhuma. Nto vano awo akilanthé vale. Ni mahala paahi ooreerexa, moota Owo owiireny'awe.

²³ Munoowerya ovenya? Nkinthuna wookhalihani o—o—owooneihani . . . Vayi, kankuru ene aari vayi? E—epantte yo wiitho, moone vale, epantt'ile yo wiitho wawe, wenna nno, vanikhuvani n'onlakuni wawe, waattamela vaniithoni wawe. Vano Muluku khunvoniha. Owo kahi oothamaleya?

²⁴ Akavi yaari vaava Ettiminku evinre wira yoone etthu Apwiya yiiraly'aya ni yoowoona? Mulopwana, aarakanle ni ahoona, aakilanthé vaava vakhaterani va roota. Vano yaahikiwerya okathi mulopwana mutokweene ole aakilanth'awe va khwira, "Munna Branham . . ." Kookupali wira aari munn'ola va. Khwira, "Nwiirele yeeyo amwaar'aka." Owo ookhalana amwaar'awe va arakanle. Murima aka waahithuluwa. Kaanithuna . . . Kaamuvaha etthu p'itthu molumwenkuni vaakhanle wira kaaniwerya, masi kahi . . . kahi mwa owerya waka. Masi enkhala mwa owerya waka ni owerya wanyu, wira nivekelele wira Muluku aire. Owo ookhalana amwaar'awe arakanle, ntata noorakala, nnewu noorakala, ntoko

siiso. Nto mulopwan'ola aari ootepa waavikana awo, okhala wira awo anniwerya ovenya ni anniwerya weetta vakhani, masi mulopwan'ola hata khaawerya wira siiso. Vano owo... Ottoopore, mutika awe muulupale woomulipiha waahikhwa. aMayo, ni anci-ene akina, yaahimukhalihya oohiroromela. Vano muKatolika mmosa khimuruma wenna, tothoro mmosa muKatolika; vano mwan'awe mmiravo phaatiiri oSaint Meinrad oJasper wu, Indiana. Masi awo maluku a mulipiheryo wa muhakalalih'owo onrowa okhala, iwe.

²⁵ Nto okathi ovennyaawe, owo iirale, "Masi nkinwerya..." Owo aahiweha, khwira, "Ayo, kinniwerya." Uupuwela wira khaawerya wona, moosuwela. Vano owo khuweha osulu, nto khuvexerya muru awe osulu, vano vo aaniwerya weetta ni wona; khweetta munvireloni mme, mmansawe. Vano awo yaari aPrespiteriyaano. Owo aari ortotoksa. Nto mukileele... Nyuwo munuupuwela wira aPentekosite ni atthu a Osantu paahi t'anwerya okhuwela; moovonya. Awo vekeekhai anniwerya okhuwela yoonaru etthu ntoko eyo okhumelela; epatikhanaka mmosa ni mukhw'awe ni okhuwela. Khukhuma eettaka akhuruwelaka ixikatta, apurulaka ekhater'awe ya iroota; eettaka, openunwe-ene mutika wo omulipiha mmuruni mwawe. Muupuwele yeeyo. Eettaka ntoko nyuwo wala miyo kaarow'aka weetta. Oh, Owo t'othamaleya.

²⁶ Vano, Paulo oolepa Eliivuru y'aHeperi. Nto mwa olepa nno wa aHeperi, owo oolepa Eyo. Ni owo ohinatthi olepa Iliivuru iya, hiyo ninnoona wira... Vano, ninrowa... Nla nisomi na exikola ya Ttiminku, nto kinoophavela oweha ni ohipisa vanci-ene. Vano nto ninoorowa okhalana okokhorela, wira nitthikele olelo ohiyu, Apwiya yatthuna vale. Vano, Muliivuruni mwa aHeperi ni Iwarakha sikina sa Paulo...

²⁷ Paulo aari pani? Owo aari muHeperi oowiivaha, musomi, ni mwiiixuttihi muulupale a Waataana Wa Khalayi. Ni owo aasomihiwe ni mmosa w'axilopwana oosuwelaxa a mahiku awe. Ookhala okihimenrye nle naari nsina nawe. Kamaliyeli, mmosa w'axuttihi aalupalexa a mahiku awe. Nto Paulo aahikhala munawoni mwa Kamaliyeli.

²⁸ Yookhala etthu ya...nipuro onrow'anyu, ekereja onrow'anyu-wo, ni mwiiixuttihi oniwiixuttihani. Mwaanisuwela yeeyo? Yo—yookhalana etthu wa yeeyo. Tivo nihaana ophavela ele yootepa oreera nikhanly'ahu ophwanyaka, wira naakhele yootepa oreera; kahi mwaha wo okhala yowaataaneya ni siiso, masi wiixuttiha w'ekeekhai wa Bibilia.

²⁹ Nkawehani, okathi mmosa Isarayeli aakhumaly'awe arowaka mothakoni n'anakhotto aya, ni yaheetta mukwaha wa mahiku mathanu na manli, vano yaahaamalela maasi. Ni yaahalela opweteya, awo khwira, "Oh, vaakhanle wira aahikhala profeta vakhiviru!"

³⁰ Nto mmosa aya khwira, “Nookhalana nno, Elisewu. Owo aayeherya maasi mmatatani mw’Eliya.” Munniwoona axirikh’awe? Mwa moolumo makina, “Va ori Elisewu aarina oxirikha ni Eliya. Masu a Apwiya ari ni yoowo.” Munniwa? Owo aahixutthiwa oratta-ene. Nto owo khwira, “Owo ori nno. Nrowe namukohe yoowo, okhala wira mwiixuttihi awe aari Eliya, ni owo ookhalana mwiixuttiho w’Eliya mwa yoowo.” Munnoona evirikanelo erin’aya? Vekeekhai. Hiyo ninthuna oxuttihiwa.

³¹ Tivo, Paulo aarina mwiixuttiho wa Kamaliyeli. Ni Kamaliyeli aari mutthu muulupale aathanlale, ory’ene musomi mwaneene, wira okathi epaceny’aya evitikavitika ela yothene mukereja yoopacerya, owo iirale, “Nihikwanye eyo, axinna. Yaahikhale ya Muluku, enoomalamala mmansaya, khula enamuna. Masi yakhala ya Muluku, vano hiyo khunawana-no, ninoophwanyaneya niwanaka ni Muluku.” Moone, owo aahikhalana mwiixuttiho wooreera.

³² Paulo aannuwale vathi va mulopwan’ola, ni aanisuwela wira Paulo aari mwixuttihi muulupale. Tivo, nihiku nimosa, vaxariya-vo mmurimani, alupathaka Ekereja, arowaka wira aathukwele.

³³ Vano nrowe paahi nikuxe ehuhu ekina yaamukhaani ya Paulo, okathi onikhalih’ahu mulipiheryo ahu.

³⁴ Yuta vamoral’awe, moothekani, mwaha wo ophenta musurukhu ni wiisoona wa makhalelo, owo aahimora mwa mahala khurowa opuro awe. Vano awiixutti yiirale, “Ahaana okhala muloko nanli.” Nto ekereja, ni nttittimiho aya wothene, wira owooniheni ele ekhanle ekereja; ni nttittimiho aya wothene ni owerya waya wothene, eyo nlelo eri imiilya imilyawu sene, wa okathi aya wooreera. Awo yiirale, “Nihaana omphavela, mmosa eriyari ahu, onrowa okhala opuro owo.” Vano awo yaahimuthanla, ni ehako, Matiyaxi. Mateyaxi, kookupali, ahiiso Matiyaxi. Matiyaxi, kookupali wira ti yoowo. Nto vamuthanlaly’aya khimuhela n’ale muloko nanli, ni muloko ni mmosa, yaamaleliha muloko nanli, owo khaapakale hat’etthu. Owo p’ukathi mmosa paahi nsina nawe ninromoliw’aya mwa Soolempwa. Eyo yaari ekereja yaathanlale.

³⁵ Vano, awo yaahuupuwela, “Owo mutthu oolakeya.” Vekeekhai. “Owo mutthu oothamaleya. Owo musomi. Owo t’osuwela. Owo t’osoma. Owo mutthu oothamaleya. Owo aamukhala voopuroni va Yuta ni akhale mmosa a hiyo.”

³⁶ Masi, moosuwela, Muluku imaara sikina onnikhalihika sikina sa...wuupuwela wahu, ithanlelo sootepexa okhala s’elolo. Vano, Muluku aahimona muYuta mwaamukhaani a ephula yookhoropana, ntoko ooviruwa saawery’awe okhala, ni eyano awe yoorukunuwela epantte emosa, “Miyo kinoorowa, kamutthukwele khula mmosa w’ale. Kini—Kinimwaahela

mukhatteya ale. Kinimwiira *ela*.” Eyo yaari ethanlelo ya Muluku.

Akina aya yaamukunxe musomi ni namu-rummwa. Iwo othanla wa ekereja.

³⁷ Moone, nyuwo khamunsuwela ti pani ule ori waltaari. Nyuwo khamummusuwela ti pani ule munimuhimeery’anyu onamoona, mukhatteya wala nipuro pi nipuro. Pooti okhala ntoko nanwana ekhotto, maaru awe oohononeya, maitho oopereya, ni, masi nyuwo khamunsuwela ti pani uwo. Nyuwo mphavele nsikhi nanyu paahi, ti yeeyo tu, munvahe Masu. Muluku t’oniira ethanlelo.

³⁸ Nto Muluku onimuthanla muYuta ola mwaamukhaani ooviruwa, ahiiso aamuthanlale, kiireke. Arowaka iwe, “Kinoorowa iwe kaavare. Kino—kinoowooniherya ethu enwery’aka wira siiso,” vano Muluku aahimmoroxela vathi.

Muluku khwira, “Eyo ethanlelo Aka, vale.”

³⁹ Eyo khiyaarowa okhala y’elolo, wa ekereja? “Vano, owo onlupattha ekereja. Owo mutthu a itthu s’erutthu.” Masi Muluku aanisuwela ethu yaari muhina mwa mulopwan’owo. Munnoona enihimy’aka?

⁴⁰ Tivo, Paulo aahikhalana musuwelelo. Akavi anaamini wira musuwelelo onrwa mwaha wo orukunxa murima? Vekeekhai. Vahaakhanle siiso, kaamuhoverya orukunxa murima iwo. Orukunxa murima onniruuha musuwelelo. Ni nyuwo khamukhanle ohelelaka ethu p’itthu vano. Imaara sikina pooti okhala okhuwela. Imaara sikina pooti okhala olavula ilavulelo. Imaara sikina pooti okhala wunla. Imaara sikina pooti okhala wiipulela. Khamunsuwela exeeni, vano muheereryeke ohelela yeeyo. Okhala wira, khula mmosa a nyuwo ohooniherya wira yookhala evonyeieye mwa yeeyo, nyuwo aMetotista, ni nyuwo aPatista, ni nyuwo aNasareno, ni aPentekosite.

⁴¹ Kinniwoonaka atthu okhuwela voviilipiha ntoko saawery’aya, ni owiiyeryani eweero vaniinoni vanyu, yaawerya vale. Ayo, mulopwana. Koowoona atthu olavula ilavulelo ntoko oyeeherya epwiri vasapalani yoowuuma ya enyompe, ni—ni vaxariya-vo, emutaphwelaka soona epante ekina w’eyano, ni woohitani mmilo vaakhanle wira yaaniwerya. Ti yeeyo. Vano itthu iyo khasi...Khiivo ekhweeli mukhanly’anyu wooniheryaka-no, enkhala ni makhalelo mutthu uwo oneettel’awe paahi. “Ni mihokorokho saya, munimwaasuwela.”

⁴² Tivo, yothene eyo onsuwela Mulukuu. Owo t’onthanla. Owo onniruuha itthu vamosa, nto ti siiso ery’aya. Vano makhalelo anyu yaalikanaka ni mihokorokho sa mBibiliani, murina etthokelelelo yooreera saana. Eroho anyu yaakhalelaka onamoona Eroho Awe, wira nyuwo mw’ana a Muluku alopwana n’athiyana, mu...Sootakhala sothene sa khalayi soolakaseya, nto sothene sookhala isya, nto nyuwo munkhala

mwa ophenta, vano mookhalana murettele, ni mahala, ni siiso, munimwaattamela saana Omwene nto. Okhala wira, Ekumi eri mwa nyuwo ennikumiherya muthinto yoowo w'ekumi. Munnona?

⁴³ Mwairaka wira, “Oh, aleluya, koolavula ilavulelo. Aleluya!” Eyo khenihimya hat'etthu. Eyo khenihimya etthu ovikana ntoko wira mwaamukhuma va orumiha nsipo ni pankwe wala etthu. Eyo khenihimya etthu. Hata wira mulavunle ilavulelo, hata wira murookhuwela, n'utthimaka nno ni nno munvireloni, ni wunla maithori ntoko wira mwaopera isapola, eyo khenihimya etthu, hata etthu, vahikhanle wira makhalelo a mahiku othene annilikana, anookhala ni Yeeyo.

⁴⁴ Vano, nyuwo mwairaka itthu iyo, n'utakaniha ekumi iyo, “amen,” eyo, eyo ti yoolikana. Ti yooreera. Masi nyuwo pooti wira itthu iyo muhikhalanne makhalelo awo.

⁴⁵ Vano nto, kuhiyo okhuwela, nnakhala etthu emosa siiso ekhanle eyooniheryo. Yesu ohimnye wira, “Ni mihokorokho saya, munimwaasuwela.” Ni muhokorokho wa Eroho kuhiyo olavula ilavulelo. Owo kuhiyo muhokorokho wa Eroho. Okhuwela kuhiyo muhokorokho wa Eroho. Wunla kuhiyo muhokorokho wa Eroho. Masi, ophenta, ohakalala, murettele, ovilela, othunku, oreera murima, waamini, wiiyeviiha, wiisumaaliha, iyo ti sikhhanle mihokorokho sa Eroho. Munnona? Ti seiyo sikhhanle mihokorokho sa Eroho. Vaareera.

⁴⁶ Vano, etthu nikhalanenly'ahu itthu iya, awo onaasivela opaka mitthenkeso, moone. “Ahe, ninookhalana. Attottopeliwe Muluku, othene anaamini ntoko *hiyo* sinaamin'ahu, ninoorowa ephiro *ela*. Othene anaamini ntoko *hiyo* sinaamin'ahu, ninoorowa ephiro *ela*.” Masi Muluku ontthuna wira othene erowe ephiro *Ela*, olukama osulu.

⁴⁷ Vano, Paulo, vaamanly'awe okhalana musuwelel'ola, nto owo uupuwela wira waari musuwelelo wooreerexa. Vano, moota...Nrowe—nrowe—nrowe nihimye musuwelelo yoowo vakhani. Paulo aatthara ephiro arowaka oTamasiku, wira aathukwele etthu yaari iwe, okhala wira Ehapari yooreera yaahimwareela iwe. *Ehapari yooreera* enihimya “mihupi sooreera.” Nto vano awo yaahimwaramwareya iwe, nto etthu anci-ene yaanivenya, oosareya ophenta, ni ohakalala, ni amphentaka Pwiya Yesu. Nto Eyo yaahimwaramwareya siiso. Tivo, Paulo aahaakhela iwarakha kamosa-kamosa sa mukhulupale a anamukuttho. Owo iirale, “Kinoorowa iwe, nto kinimwaatthukwela, khula mmosa.”

⁴⁸ Vano owo aahikuxa nikhuru naamukhaani na makwarta yaamuhoola, makwarta a mpa m'olompa, atoropa, khukhuma arowaka. Okathi waarow'aya ettharaka ephiro, ni owo asuwelaka sothene aarow'awe wira, naanaanoru, etthu emosa yaahikhumelela. Naanaanoru, waahikhala Waarya wuulupale

ohoolo wawe, Waarya wuulupale. Vano, Owo waahaarya ntoko nsuwa. Eyo etthu yootikiniha okhumelela. Waarya waahaarya vanci-ene mpakha owo paahi, maitho awe yaahalel'aya, ompweteya. Vano aahimorela vathi. Nto owo—owo aahimmaathi vathi, khuweha osulu.

⁴⁹ Yaahikhala khino atthu muloko wala muloko n'athanu ni yoowo. Atthu awo yaahoonu Waarya iwo? Nnari, mulopwana. Paulo aahoonu. Khiyaavaheriwe atthu ale woona. Tivo, atthu kamosa-kamosa anoowerya woona itthu, seiyo, akina ahinon'aya. Munnona? Vano, Paulo aahoonu Waarya iwe, mpakha waamukhalihaly'aya oohoonu. Owo khaawerya woona, mahiku manci-ene, Iwo waari ekeekhai wa yoowo. Ni owo khaawerya woona manci-ene . . .

Ohoolo waya, okathi waalep'awe ipaphelo, maitho awe yaanimuhaaxa vanci-ene mwaha wa yeeyo, mpakha waalep'awe ni malepa maalupale. Owo iirale, "Woonaka wira kihoolepelani ni malepa maalupale." Owo waanimurikela woona.

⁵⁰ Owo aari mukhatteya, vano aahaavekela Apwiya onvonihani. Ni aahaavekela Awo imaara ttharu. Masi Apwiya yaahimmyeni? "Mahal'aka annoophiyeryani, Paulo."

⁵¹ Paulo khwira, "Vano kinimwiittotopa mwaha w'ohilipalipa waka." Okhala wira, owo iirale, "Wira kiihikuxererye vasulu va Muupululo, koovahiwa namuhupi a xetwani, mwiiwa mw'eruthuni, wira akihaaxe." Owo aanivona okathi vakhani, vano nto aanitthikela atepaka.

Ohaaxa enihimya "omana ni omana." Ntoko paketi mphareya, moosuwela, mawimpi anoomuhaaxa, moone, omana ni omana.

Ni owo aani, aamukhala mukumi, vano n'ukhalana-tho; vano okhala mukumi, n'ukhalana-tho. Owo khwira, "Pwiya, exeeni enikhumelela, Nyuwo ohikumihaka ela mwa miyo?"

⁵² Awo khwira, "Mahal'aka annoophiyeryani, Paulo. Mukeleleke ohoolo paahi." Eyo yaahikhala . . .

⁵³ Owo khwira, "Vano, vaari—vaari wira kaari ooloka, ni sothene sooloka," khwira, "weso mwa weetta waka, oh, kaamwiikuxererya ni wira, 'Moone, khiivo evonyeieye ni miyo. Apwiya annikikhapelela, munna. Aleluya!'" Vano munookhala naxariya mmansinyu.

⁵⁴ Muluku ohaana woovahani etthu yaamukhaani, imaara sikina, wira oomaaliheni vakhani, moosuwela. Ti yeeyo. Ntoko wookhalihani oosuwela wira Owo ti Mukhulupale. Oh, Owo kahiyo oothamaleya? Ayo, mulopwana, ovuwa paahi!

⁵⁵ Tivo owo, Paulo, nto, vano, numala okhalana musuwelel'ola . . .

⁵⁶ Vano, eyo aakhanle mutthu olelo, yaamwiiriwa, "Oh, attotopeliwe Muluku, aleluya. Nkoonani, Apwiya aakiirela

etthu! Avuwihawe Muluku!” Masi kahi Paulo; owo aari musomi a Bibilia.

⁵⁷ Musuwelel’owo ohaana olikana ni Masu a Muluku. Ayo, mulopwana. Waahikhaleru wothene woovaraana ni Bibilia. . . Kahi oweha *va* paahi, wira, “Oh, ayo, ela eri *va*. Attotopeliwe Muluku, kihaana.” Huh-uh. Eyo kahi t’inamuna Muluku onivah’awe Yeeyo.

⁵⁸ Ohaana okhala Bibilia othene, othene Owo. Okhala wira, nyuwo pooti. . . Atthu oohaamini annimurumeela Bibilia yoola ntoko niwoko naya no ovaanyiha-no. Masi awo anookuxa Yolempwa yaamukhaani *va*, orukunxela nno n’ukhalana ekina yaamukhaani *va*, ni weererya okhaliha soowiiwanana, nave iyo myaha miili soovirikana, voomalela. Tivo, muhaana okhaliha Yolempwa olikana ni Yolempwa.

⁵⁹ Ntoko Yesaya sihimaly’awe, kapiitulu 28, “Ehaana okhala yooruma vasulu va yooruma, yooruma vasulu va yooruma; vakhani va, vakhani vale.” “Muthanleke sooreera.” Moone, ti siiso Eyo enrwa: yooruma vasulu va yooruma vasulu va yooruma, Masu vasulu va Masu, Yolempwa vasulu va Yolempwa. Yothene ehaana wiiwanana. Mwaha wa yeeyo, kinoon’aka wira, mwa masomi ala ntoko sinkhalan’ahu vano, etthu yuulupale wa ekereja, okhala wira anniruuha nipuro Soolempwa sothene siniwanan’aya vamosa. Nto musuwelelo ahu ohaana wiiwanana ni Yolempwa eyo. Oh, ela va! Yaahiiwanane, nanso yoovonyeya.

⁶⁰ Ni moota weettaly’aka mwa miyaakha, kihisuwelaka exeeni waari Waarya iwe wammoroxenle Paulo vathi. Okathi, olumwenku w’ota, Soolempwa. . . Atthu, alaleyi yeerery’aya okileela wira, “Eyo ti ya xetwani. Vano, munookhala nahako. Munookhala naminepa. Muhikwannye Eyo, Billy. Yookhala etthu evonyeiye ni Yeeyo. Muhiire, mmiravo. Ti yoovonyeya. Owo ti xetwani. Ahe, mmiravo, munookhala namakoha minepa. Munookhala naminepa mwaira-ru siiso. Oh, sothene iyo ti sa xetwani. Kahi—kahi yoolikana.” Masi okathi. . . Miyonkaathuna olaleya eyo.

⁶¹ Masi attharaka ephiro orowa oTamasiku, Paulo khaathuna olaleya eyo, mpakha osuwela sinto yaari yoolikana wala nnari. Vano owo aaronwe wArapiya mwa miyaakha miraru, n’usoma Yolempwa. Ah! Vakhumaly’awe, owo khwira, “Vano mweererye okitatha eyo.”

⁶² Owo aahisuwela wira aahaana okumana n’aFarisi. Owo aahaana okumana n’aSatukhi. Owo aahaana okumana n’ulumwenku, ni olumwenku w’Amalapo. Vano nto Paulo, Bibilia ola olempe, Eliivuru ila y’aHeperi, elepeliwe yeeyo. Owo onaatatha aHeperi ale, ni okuxa Waataana Wa Khalayi iwe ni wooniherya va mwa Waataana Wa Naanaano. “Ola Mulukuu,” owo iirale, “Ela eri va, mwa—mwa maprofeta othene ni

sothene.” Ompacerya ottuli wu wopaceryani, kapiitulu 1 ntoko soonaly’ahu, “Tthiri Muluku khalayi, ottuli okathi wa khalayi, ni inamuna sinci-ene, aahaalavuliha axitiithi ni moolumo a maprofeta.” Ti siiso Muluku aaruuh’awe mutthak’Awe, wootoliwa ni Urimi Tumimi. “Masi mahiku ala oonilavuliha ni moolumo a Mwan’Awe, Kristu Yesu,” owootoliwa ni Bibilia Awe. Eyo eri vo.

⁶³ Tivo misuwelelo iya olumwenku oniiir’aya, “Oh, ti ya mmuruni. Vano, khaavo...” Okathi naaruuly’aya Nlaikha nle, Waarya iwe ohitto nno omuro, okathi waalaley’aka muhakalaliho aka wopacerya nno vanloothoni, naahaapatisa atthu ale othene...Kookupali, Munna Fleeman, siiso mury’ene mu...Nkisuwenle sinto mwaari wenna okathi ule wala nnari. Akavi yaari wenna okathi wa—okathi Waarya waakhumelenly’aya omuro? Ookhala mmosa w’ale a akhalayi va? Ayo, amosa-amosa. Okathi Owo, waakhuruwenly’aya nno omuro.

⁶⁴ Nto awo khwira, “Waari wiithepya wa eyoonelo.” Anciene a hiyo naarimweemela, niwehaka Yeeyo, nto va Eyo yaahikhuruwa. Vano nto miyaakha ohoolo waya, Muluku ohooniherya Eyo ni niitho na kaamera. Eyo ekeekhaii.

⁶⁵ “Ahe, eyo e—eyo ti yoothepeya, eyo etthu eni—eni...?” Nnari, mulopwana. Hiyo ninkuxa eyo mBibiliani mu ni owoonihani. Ti Pwiya Yesu mmosaru. Owo oniiira etthu emosaru. Mwiirelo Awe mmosaru. Owerya Wawe omosaru.

⁶⁶ Nwehe, Ettiminku evinre, va. Iwe, kimpaathale-ene voolilini vaka, kiira kihinatoko omoona mulopwan’owo kookhalaru. Aarimoorwa khwira, “Ookhala mulopwana mmosa otapernakulu, nto owo t’ottweelela, a maihi ooriipa, onootweelela. Owo t’ohoono, ni khonwerya weetta. Owo ori vakhaterani va iroota. Mulopwana mmosa a maihi ooriipa t’omurumme nno; meetiku, Dr. Ackerman, mulopwana mmosa a maihi ooriipa, mulopwana muKatolika. T’omurumme mulopwana mmosa, okilantho *weuwe*. Nto SIISO ANIHIMYA T’APWIYA,” aahivenya, khukhuma eettaka ni woona wawe ni sothene. Exeeni yiirale? Va nri Nlaikha nenlo. Nimosaru Nenlo nammoroxenle Paulo vathi, mphironi arowaka oTamasiku, ninkhala muKereja Mwaya ni atthu Aya olelo. Eyo ti Yoolempwa enlikana ni Yoolempwa. Ti siiso erin’aya okhala.

Oh, hiyo nookhalana ale *ookuttihiwa*. Ninkelela yeeyo, nuvira okathi vakhani.

⁶⁷ Oh, hiyo nihaana etthu emosa yoowiixerya ohoolo wahu, nawerya-ru paahi okela mwa yeeyo, olelo ni ohiyu. Vano yoopacerya okela mmaasini moowiixa. Vaavo nyuwo... .

⁶⁸ Moosuwela, okathi waary’aka mwammiravo, kaahikhalana ntthiya naamukhaani wiithela w’empa, nto kaanirowaka weiwo. Nto hiyo axinamwane othene naanikelaka, pwiti-pwiiti;

axikhaani, a miyaakha ntoko mithanu na mosa, mithanu na miili. Nto hiyo...Maasi t'owiixa ntoko so. Khinaari ovikana ntoko wiiwolowa wa ekuluwe. Ni kaahikhalana ekaaxa ya esapawu weiwo. Kaanooniherya wira kaaniwerya opwina; kaavarela ephul'aka, ni wuumulela, kirowaka *siiso*. Nto erukulu aka yaamukhaani yaanimana marove, moosuwela, ni yaanivavela khula epannte. Miyo khwaaleela atithi aka wira kaaniwerya orapelela.

⁶⁹ Awo yaahikiroiha wiithela iwe nihiku nimosa. Awo khwira, "Kintthuna kiwooneni orapelela." Miyo khutuphela mme, moosuwela; khurula ikuwo saka, etakwarikhwa yaamukhani ya nasope; nto khutthimaka, khukela mmaasini. Khupacerya wuumulela, marove emorelaka khula epannte. Nto apaapa yaarookilaathi vamuthatoni. Awo yaakilanthe vale khukiweha minuutu vakhani. Khwira, "Mukhume vanrattani vo va maasi, murape, murowe owaani." Munnona?

⁷⁰ Ahe, eyo paahi eri ntoko, amosa-amosa a hiyo niniisihana aKristu. Nnimwaapasa vamaroveni. Ti yeeyo. Vakhalaru wira muroothhukeleliwa, "Miyo ka Mmetotista. Miyo ka muPentekosite. Miyo ka muPrespiteriyaano. Kookhalana eyooniheryo; kihaakhela." Nyuwo munaapasa vamaroveni.

⁷¹ Nihiku nimosa kaari ni haalu aka. Miyo kaakhala kimuleelaka...Owo aarina miyaakha, soophiyaka muloko ni mithanu, muloko ni mithanu na mosa. Hiyo naari muro. Miyo khwira, "Haalu Lark, kinniwerya orapelela." Nto miyo kaakilanthe ottuli wa mwaatiya, moosuwela, kaaniisoona saana ni oolipa. Owo khukuxa ekaafi khukisukhumela, mmaasini moowiixa ntoko imeeturu tthaaru. Yaari yoovirikana nto; wuumula wothene, okhuwela, sihinatoko anyu wiiwa mookhalaru.

⁷² Nihiku nlo munoosukhummwa, vanreerela musuwele veemenly'anyu. Ayo, mulopwana. Mwamusuwelaru Owo, munookhala...Vanreerela omusuwela saana Owo. Ti yeeyo.

Masi vano ninrowa okela mmaasini moowiixa, maasi oowiixa, yaawo anrowa woopwinihani mwa—mwaahikhale-ru muKristu, oolyihiwa saana.

⁷³ Nwehe Masu. Paulo, aatonko ophwanya yeeyo. Owo aathikenle mwa Waataana Wa Khalayi, nto khuphwanya ela. Owo aahoona musuwelelo awe owo, voomalela. "Vano yaari exeeni Ile yaakimoroxenle vathi?"

⁷⁴ Waari Waarya, Waarya wuulupale waaphwanyaneya vale, waaryaka ntoko nsuwa, ory'ene wiitho wawe. Owo khwria, "Saulo, Saulo, munikilupatthelani?"

⁷⁵ Owo khwira, "Pwiya, Nyuwo mw'Ani miyo ommulupatth'aka?"

⁷⁶ Owo khwira, "Miyo ka Yesu."

77 “Miyo koona wira Owo mu—mutthu, aarina mahalalapa mmatatani, enihimmw’aya wira onnikhumelela mmithukumanoni vano, ni mahalalapa a ipereku mmatatani mw’Awe ni mmuruni mw’Awe.” Nnari, nnari; kahi erutthu *yeeyo*, kahi mw’erutthu *yeeyo*. Munnona? Owo Waarya vano. Saulo. . .

78 Okathi Owo aary’awe muumu elapo ya vathi, Owo iirale, “Miyo kikhumme wa Muluku. Kintthikela wa Muluku.”

79 Owo aari Nlaikha naaweettihale aana a Isarayeli moWaaryani mu, eviraka mothakoni. Owo otthikenle okhala Waarya weiwe. Nto Paulo aahoono, mwa Waataana Wa Khalayi. Owo khwira, “Miyo ka Yesu, Nlaikha no Waataana.”

80 Vano Owo aahikhala erutthu, wira anivuluxe. “Khaakuxale mukhalelo wa Malaikha,” ninniphwanya ikapiitulu s’ottuli, hiyo ninsom’ahu. “Owo khaakuxale mukhalelo wa Malaikha, masi aari Osuulu w’Abrahamu,” wira Owo asuweliwe, wira athhu ewerye *omoono* Muluku. Amen.

Vano Owo khwira, “Miyo kintthikela Yeeyo.”

81 Nto okathi Paulo oonaly’awe Eyo, owo iirale, “Tthiri, aari Yoowo. Ole aari Yoowo.”

82 Petru aahikhalana musuwelelo ohiyu omosa okathi waavekel’awe. Waarya weiwe omosaru waahikela mpaani, khuhula mikhora ohoolo wawe, khukhumela mphironi. Nto Petru oona wira aamuloha; owo khaareere ottikittheliwa. Owo khaasuwenle etthu yaakhumelenle. Owo iirale, “Kinoomalaru ovenya? Masi kiri vate va mphironi.”

83 Vano owo aahirowa owannyawe Yohani Marku. Vano mwali mmosa aahihula mukhona, mwamuthiyana mmosa iwe, aari vamuthukumanoni va mavekelo. Aahikhala mutthu aamana mukhona. Khuhula mukhona. “Oh,” owo khwira, “ola ti Petru va. Nyuwo munonvekelela wira akhume mukhatteya. Apwiya aamutaphula.”

84 “Oh,” awo khwira, “exeeni iyo.”

“O Pwiya, mmutaphule!”

85 “Vano,” owo khwira, “owo eemenle vamukhona, onoomana.”

Petru aanitthikela amanaka, “Mukihiye kivolowe.”

86 “Oh,” owo khwira, “ti Petru.” Mahiku ale, awo nlelo aakhalana eyo, ekhottiheryo yaamukhaani. Ettiyelo yaamukhaani va, munivenyaanyu khuweha vate, moone. Muhinatthi omuhiya muletto anyu ovolowa, muhaana osuwela t’ani ommana mukhona anyu. Okhala wira, yaahikhala anawiiye; mwaahunle-ru mukhona, awo yaamuwiivani.

87 Tivo, awo yaahihula mukhona. Owo khwira, “Ti Petru.”

88 Awo khwira, “Oh! Oh, wulu, owo ohookhwa. Nlo nlaikha nawe neemenle vo. Munnona? Orookela mw’erutthuni mwawe yoovuwihiwa, moosuwela, eteyofaniya ele.”

⁸⁹ Munnuupuwela moota waasomaly'ahu, Tiyamante muulupale, moota Owo oonihery'awe Waarya, moota waahokolowenly'aya iwe? E... "Empa ela ya vathi wa yakurumuwa vale, nookhalana emosa ennilipelela."

Nto awo yuupuwela wira Petru aahikhwa, erutthu ila ya khalayi yaahimora, nto yaamurowa osikha muhina mwa mahiku vakhani, owo aahikela mwa nlaikha nawe, ahiiso yoovu-. . . Kahi erutthu yoovuwihwa, masi muteyofaniyani mwawe, erutthu etthokihwe. Ela khiyaawerya ovahana matata. Kherina matata wira evahane, siiso, masi eyo ekhalelo ya mutthu. "Aahirwa, vano aamana mukhora."

⁹⁰ Owo khwira, "Nnari. Ti Petru. Owo eemenle vale." Owo khuhula mukhora khuvolowa. Owo aari vale. Vano, Petru aahitaphuliwa ni Waarya nno.

⁹¹ Vano, enamuna emosaru ale oopacerya...ale Paulo, muKereja yoopacerya, voonaly'aya Waarya iwe wa Muluku waaryale wa Paulo, Etthu emosaru yeeyo yookhuruwa. Vano, atthu pooti ohimya khula etthu, eyo khenikhalihi yoolikana. Masi Muluku aalipiheryaka etthu, muteko Aya onnooniherya Eyo. Vano, kaamera onnooniherya Eyo. Nto sothene hiyo... Apwiya siiraly'aya, sookhalihwa voomalela, voohivonya wira Owo Mulukuu, ni Soolempwa, ni mwiirelo Aya, ni musuwelelo. Masi awo khaniwelela.

⁹² Nkawehani mu etapernakulu ila. Vano, muupuwele, nyuwo moosuwela ela. Hiyo khaninthunexa mittitthi. Hiyo khanrina hata nipuro no waapweha-vo, khula enamuna. Masi, nwehe. Muthukumano ntoko ola, vaavo ninthukumanel' ahu ila, waahaana okuxa murima Mittetthe Falls. Masi awo ahookhwa. Awo ahookhwa mara. Aakhalana maitho masi khanwerya woona.

Nyuwo muniira, nyuwo, "Vano, Munna Branham, awo khanrowa wa matothoro wira yareheriwe maitho aya?" Owo khonwerya oreherya muthinto owo wo woona.

⁹³ Yesu oohimya, "Mwaakisuwenle Miyo, mwaamusuwela nihiku Naka." Owo iirale, "Nyuwo aFarisi oohoona. Munniwerya otaphulela makhalelo a wirimu, masi ithoonyeryo sa okathi, khamunwerya otaphulela."

⁹⁴ Eyo khenoovirani vamuru? Nwiriyan. Nkawehani ithoonyeryo hiyo onkhal'ahu-mo va. Vano, kahiyo paahi e...Miyo, mmansaka, miyo ka mutthu paahi, nnakhala mulaleyi, onihimmwa. Nkisomme, ele olumwenku oniihan'aya, "mulaleyi." Ni hiyo n'atthu oohaawa paahi. Nkawehani empa mury'ahu-mo. Nkawehani ikatetrare, voosiis'ula. Masi nkawehani vatthu Muluku vary'awe. Vo ti vari etthu ene.

⁹⁵ Ti siiso aary'awe Mowabi eemenle-ene iwe ni waarya wawe wothene mwa oreera wawe, masi vale aaphwanyaneya Isarayeli muheemani. Masi Muluku aari vayi? Naahikhala nikhuru na

masantu oophirikeya iwe, sothene saapakaaya saari soovonyeya. Masi Palaamu, pi—pixipu aya, aahivonya woona Mwal'ole woomaniwa, Enowa ele y'ePoronse, Nripu nle na Mooro. Maitho awe yaari eevasi. Owo khaawerya woona. Owo khwira, "Awo animuupuwelela paahi Iyo." Masi Owo aari vaavo.

⁹⁶ Attotopeliwe Muluku, oh, Owo ori vaava! Muluku ori vaava, ni Owo oniira etthu emosaru Owo oniirak'awe. Ni Owo ono- . . . Hiyo ninoolikaniha Yoolempwa ni Yoolempwa. Muluku khonaisooniheryeke Mmansawe ntoko etthu yuulupale, elapo ya vathi, masi Owo kweekwe aakhala eriyari y'atthu pure ni oowiiyeviha. Nto Owo ori va voosiis'ula, avaraka etthu emosaru. Yoolempwa enniliherya. Kaamera onnilipiherya Eyo. Vano, eyo, mwaha onihimery'aka elatarato ele, kahi mwaha wa miyo okhala vaavale. Miyo ka—miyo ka natampi paahi, koopoliwe ni mahala, ntoko nyuwo. Masi emphavel'aka ohimya, ti, Ti Mukhalelo Awe ni hiyo. Eyo t'itthu ene yuulupale. Ahe, Owo aakipanke e—Elisewu oowiipaka erutthu, mwahaarina waamini wira mwaamini, khiyaarowa woophwanyihani etthu.

"Owo aarwenle ale Awawe, Awawe khuhimwaakhela Owo."

⁹⁷ Mwaha wa yeeyo, opooma nno olelo. Vano, kaamuwerya opacerya muhakalaliho nno, empa emosa yuulupale wala etthu siiso, khimwaarowa okhalana atthu anci-ene yaarowa waamini. Awo khanrowa waamini. Khanwerya. Mahiku aya aamala.

⁹⁸ Nisomi nenla, voosis'ula, wAfrika, khino naamwaaruha oophiyaka ikonto muloko, mano, atthu ikonto muloko wa Kristu; vaavo alakela aarowa okhala natampi mmosa okilantha va voosiis'ula, wala etthu siiso, mutthu otthikenle ottuli. Anci-ene aya aroolaleeriwa khulaleeriwa, mpakha omala tu. Ti yeeyo tu.

⁹⁹ Masi emphavel'ahu ohimya, t'ila, Yoolempwa enlikana ni Yoolempwa. Vano, khivancala moota xeeni ory'aya musuwelelo, voohikhala wira onoolikana ni Yoolempwa, woovonyeya.

Urimi Tumimi, hata wira profeta aarenre murima sayi, owo alavularu vano mithuko iye khuhiphanima vasulu va Urimi Tumimi, yaahivonyeya. Hata wira yooloha yooneya oreera sayi, yaahiphanimeru vasulu va Urimi Tumimi, yaahivonyeya.

Okathi onamukuttho ole omanly'aya, Muluku onvenxale Bibilia Awe. Paulo oohimya, "Nakhala Nlaikha ninkhuma Wirimu naarowa orwa," aKalasiya 1:8, "naarowa olaleerya ehapari ekina ohiya ele mulaleeriw'anyu, atakhaliwe."

¹⁰⁰ Nlaikha na Wirimu nahimuhimeerya Yohani mulipa-oowuupulula, nenlo aari Muluku Mwaneene, "Miyo Yesu kooruma nlaikha Naka wira nilipiherye, ahiiso nooniherye itthu iya." Owo iirale, "Akhala mutthu onincererya nuulumo nimosa Mmo, wala okumiha Nuulumo nimosa na Memmo, yoowo onookumihiwa muLiivuruni mw'Ekumi, wa yoowo." *Ola* ori va, Bibilia.

101 Tivo, misuwelelo iya ni itthu iya ninkhalan'ahu sikhumelelaka va, sahaalipiheriwa ni Masu a Muluku, saamukhala soovonyeya; khenikicala exeeni yaarowa okhumelela, yaamukhala yoovonyeya. Vano eyo ti Yoolepwa, Ekeekhai mara. Oh, nkireere otteeliwa murima okhala mempuru a Erutthu yuulupale ya Kristu.

102 Vano, nrowe vano, ninkelela nisomi. Vano, naamalenle va owo ohimaly'awe wira, "Vano hiyo-tho nrukureriwe..." nnari...kileveleliwe. Eyo ti, kaahimya ekapiitulu 12. Kaamusoma, masi nkisomanxe. Miyo...

103 Munna Norman, omanke owannyaka, ni onnisuwela wira kinoomalaru ophiya nsana, ni axinna iwe, annisuwela wira, kinoomalaru ophiya. Okathi ene mmosa paahi kaarin'aka wo osoma Soolempwa, waari okilaathi va, minuutu vakhani sivinre. Eyo ekeekhai. Nkinisoma, kinwehererya paahi Eroho Yowarya wira ekhunle ntoko Eyo entthun'aya. Eyo ennisuwela nipuro ory'awe—vo, mutthu orina waakhela Eyo. Tivo kakhalana etthu keeteeteny'aka mmuruni mwaka kinrow'aka ohimya, weso yoovonyeya. Masi kahiya Eyo wira, Eyo enookuxa elukamihaka nipuro vantthuney'aya. Munnona? "Muhivela-vele etthu enrow'anyu ohimya, maana khamuhiyo nyuwo munlavula, T'Atith'inyu ankhala mwa nyuwo. Awo t'anlavula."

104 Vano, ekapiitulu yookiserya, ekapiitulu y'ottuli, hiyo nihiiwa ela, wira, "Ninrowa otthyawa sayi, naanyoonyeriwaka woopowa wuulupale; Yoowo opacenry'ahu olaleeriwa ni Pwiya Yesu, nto Owo n'ale amwiiwale Yoowo?" Itthu sene imosaru Yesu iiraly'awe, wira ooniherye, itthu sene seiyo siniiraneya va: Nlaikha nimosaru na Muluku, miteko imosaru, sowooniherya imosaru, sothene seiyo imosaru, sothene sintharella, Ehapari yooreera emosaru, ni Masu ene yaawo. "Vakhala wira iyo sihiixuttihiwa n'Apwiya, vano khulipiheriwa n'awiixutti Aya yaawo oniwiw'ahu," Paulo ory'ene mmosa a yaawo, "ninrowa otthyawa sayi, naanyoonyeriwaka woopowa wuulupale?"

105 Vano, Paulo aahimeerya yeeyo muthukuman'ola w'aHeperi. Vano, awo khiyaarina ikaravatooro, olelo, ntoko sirin'ahu va. Masi awo yaarina alipa-oolepa ikano yaakilaathi vale, elepaka okathi Paulo aalaley'awe.

Nto ti siiso Eyo ery'aya va. Hiyo ninaakhela Eyo ni ikaravatooro, ni ifiita iya sinrowa mulaponi mothene, moone, wira sooniherye wira Eyo ti Ekeekhai. Etiini ahu kehiyo y'ethiru, Eyo ti Yesu Kristu ohihimunwe mara, etthu emosaru. Vano nihinyoonyeriweke Yeeyo.

106 Vano, muhikhume mukereja, olelo, mwiiraka, "Ahe, vaakisivela etthu orowa iwe. Onnikisivela wiipa, ni atthu ale t'epathani a mukereja mme yaamukhaani." Muhiire yeeyo.

107 Munna, muhiye murima anyu okhale woovihiwa, wira, “Va, kihaana wira etthu wa yeela. Kihaana okhuma ni woona sinto kinoowerya omphwanya mutthu onoopowa.”

108 Ni muhikhumele ota, mwiiraka, “Attotopeliwe Muluku, mwaahirukunxe murima, munoorowa opweteya.” Nnari.

Murowe vooreema murima. “Mukhale ookasoopa ntoko enowa, oomaala ntoko epompa.” Moone, eyo t’inamuna yo orowa. Mmwaattamele mutthu, vakhala wira onaahuwa alyakhu, mulavule s’alyakhu, ni yoowo, okathi vakhani. Munnona? Vano nto, naanaanoru, munookhala mulavulaka s’Apwiya. Akhala mulimi, mulavule itthu s’olima sawe.

109 Vakhala wira ontumiha ikaaro, mulavule sa ikaro sawe, okathi vakhani, “Ikaaro xeeni sooreera murin’anyu,” ni siiso. Munnona?

110 Mpakha nyuwo ophwanya Eroho ene, okathi Atithi aniir’aya, “Vano p’ukathi wo omuhimeerya sa munep’awe.”

111 Pooti opacerya sa, moone, “Ele ekaaro yooreera. Moosuwela muteko wa ipakhira, olelo, khureere okhala etthu yuulupale. Oh, moota ilapo sikhany’aya so waattamelana; ni ipooma sa ilapo sahu, so waattamana. Apatthani n’aximai anniwerya oxekuryana mmosa ni mukhw’awe. Moosuwela, eyo etthu yuulupale okhalana ikaaro ntoko iye sintumih’anyu.”

112 “Ayo, mulopwana. Vekeekhai. Uh-huh.” Moosuwela, owo anvuraka sikaro awe, wala etthu p’itthu. “Ayo, iye, iye ikaaro sooreera.”

113 “Mootoko wuupuwela etthu atthu ale a khalayi yaarow’aya wuupuwela vaakhanle wira yaahona etthu ntoko ele?” Mutthikele mulavulaka siiso tu, moosuwela.

Okathi vakhani, mwiire, “Ayo, ayo, tthiri ti siiso.”

114 “Moosuwela, etthu ekina enikhweiha, enniruuha ntoko sinkhalan’ahu, ntoko mihakalaliho. Atthu anniwerya olapuwa mulaponi, naanaanoru, wira ekhale vamuhakalalihoni.” Moone, nyuwo munthukula ephiro, okathi wothene, moosuwela.

115 Nto moonaka wira yookhala Etthu enttiyelela ephiro, mweemele vaavo, murwe *nno*. Ntoko tothoro aahimaly’awe, oPhoenix, iirale, “Pwiya, musarihe eyano aka moolumo ooreera, nto mukikumule kalavularu voophiyerya.” Munnoona? Ayo. “Mukikumule kalavularu voophiyera.”

116 Vano, nwehe vano, ninrowa opacerya kapiitulu 15, ahiiso versiikulu 15 ya kapiitulu 3, nwiriyane vano.

*Tivo vanihimmw’aya wira, Olelo nyuwo...
mwaiwa nsu nawe, muhuumihe murim’anyu, ntoko
woopaciwani.*

117 Vano munwehe Paulo alavulaka va. Vano ennihimmwa, “Olelo, vaviraly’aya okathi munci-ene.” Ninoorowa okelela

yeeyo nuvira okathi vakhani, wira, “Olelo, okathi wa mahiku a khalayi.” Epanitte ya ekapiitulu enttharelana, “Nuvira okathi munci-ene.”

. . . vanihimmwa'ya, Olelo nyuwo . . . mwaiwa nsu nawe, muhuumihe murim'anyu, ntoko nihiku naapaciw'awe, okathi wampacaly'aya Muluku.

118 Vano nrowe nisome eversiikulu enttharelana.

Tani ale, yaiwale, khumpaca: . . .

Vano owo onihimya exeeni? Ehapari yooreera.

. . . khahiyo othene yaakumihiwe wEjitu ni Moise.

Masi t'ani ale Owo aananariw'awe ni yaawo mpakha miyaakha miloko mixexe? Khahiyo ale yiirale etampi, irutthu saya khukhwa mothakoni?

119 Nrowe neemele vaava minuutu mmosa. *Opaca*, “okathi yampacaly'aya.” Vano Muluku irale exeeni? Vano Paulo omphavela olavula. Exeeni Iyo yaaweettihale okhuma wEjitu? Aari Moise? Nnari. Moise aari ekaruma y'erutthu.

120 Vano nookhalana mulipiheryo va. Ninthuna nilakiheriwe vano. Naphiyerya nipuro nla va, muhina mwa minuutu vakhani, muni—munimoona.

121 Vano, Muluku aarina atthu yaarina emumulelo yoophilpaneya. Awo yaari wEjitu. Awo yaahikhuma nipuro naya nootthuneya. Awo yaari ota wa muttetthe aya. Awo yaari amalapo ni anawetta, nto Muluku aarowa waaruaha okhuma nipuro nlo yaatthukeliw'aya, we—wEjitu, erowaka owaani.

122 Ethoonyeryo y'olelo; hiyo nri oohilipa. Nno khivanlekela. Axinamwane oonenevasa matata ettikhasaka iperlintu, axinamwane athiyana ni amwaatteepa, erukuneyasaka; naanaanoru, munkhalana maihi oottweelela, ni moorweela mannyaari. Yookhala etthu evonyeiyee nno. Nno kuhiyo owaani. Hiyo nri nipuro noohiloka. Tivo nnihimya'ahu wira n'anawetta ni amalapo. Yookhala etthu ekhumelenle.

123 Mwamuthiyana mmosa oohimya, voosiis'ula musaala, mwaha wa moota atthu animuthey'aya, imaara sikina. Miyo khwira, “Masi, munna, oophentiwa, nyuwo khamuhiyo a atthu ale.” Hiyo n'atthu oovirikana.

124 Mwan'aka mwamuthiyana iirale, “Paapa, axiruusi *lexe ni lexe* yiirale *elexe ni elexe* yiirans'aya.”

125 Miyo khwira, “Masi, nwehe, oophentiwa,” awo yaarinasa itisku iya sa Elvis Presley, miyo kiirale, “Nkaatthuna awo owannyaka.”

126 Owo khwira, “Masi, paapa, ale axiruusi ooreera murima.”

127 Miyo khwira, “Awo pooti okhala. Miyo nkinihimya hat'etthu ya nthowa ni yeeyo. Masi yookhala etthu, hiyo noovirikana. Hiyo noovirikana. Kahi wira nintthuna okhala oovirikana, masi

Eroho eri mwa hiyo yookhuma mmo. Nyuwo mwa a olumwenku mukina.”

¹²⁸ Kaarowaka wAfrica, nkinwerya okhala oolikana ni inamuna a—a—ankhal’aya. Awo khanwarasa hata ikuwo. Awo ankhalapwiti-pwiiti. Nto anoottotta etthu yinttale, erina axikokho, n’ulya, khula enamuna; khivanvirikana nnakhala. Munnona?

¹²⁹ Ni Ela ti yoovirikana. Moosuwela, emaara emosa, hiyo othene naari siiso, masi osilimu khuniruuha ni khunikhalaha oovirikana.

Vano orukunxa murima ohuuluula vanli mwa emilyawu. Hiyo khaninthuna-tho itthu soowunta sa molumwenkuni. Kristu oonikhaliha aKristu; ntoko osilimu onikhalihaly’aya oorerela. Nto nwehe, kahi yeeyo paahi, masi ninnihimya wira n’anawetta ni amalapo. Hiyo kanihiyo a molumwenkuni. Vano, khamurina naata n’ulumwenku. Nto itthu iyo soovira.

¹³⁰ Vano, Isarayeli aari wEjitu. Awo khiyaari a wEjitu. Atthu a wEjitu, yaari yootakhala mwEjitu ohela matat’awe vasulu v’epwittipwitthi. Ni Isarayeli yaari amakampusi a ipwittipwitthi. Ni eyo khino khiyaareere omuhaaxa Moise, vaamanly’awe ni nttittimiho wothene okhala mwEjitu, anamasukiha inama.

Mooweha etthu Farawo aamuhimenry’awe Yosefe, ni sikina? “Ti yoonanara.” Khwira, “Atthu anyu t’amakampusi a ipwittipwitthi.” Nto hata ntoko mwEjitu khaakhanle onvaraka makampusi a ipwittipwitthi. Owo aari muthinto w’atthu oovirikana.

¹³¹ Nto ti siiso ery’aya ni muKristu, olelo, okathi oniyariw’awe vasya. Kehiyo... Etthu yoonanara owo wiitakanxa nipuro atthu anwury’aya n’uhimya ipwerwa soonanarasa, n’athiyana oohiwarra etthu. Nto khula... Ti, ti—ti yootakatta. Oh, attotopeliwe Apwiya! Hiyo n’anawetta nno. Hiyo n’amalapo nno. Eroho yoorukunxiwa, nto nimphavela Muttetthe weiwo athiyana ahinaawar’aya akaputtula. Nimphavela Muttetthe weiwo ohinkhalaniwa ipwaro sa saravexa. Nimphavela Muttetthe memmo onkhala-mo oxariya. Tivo, hiyo n’anawetta.

¹³² Vano, Muluku aahikhuruwa vanivisini nuulupale na Moore, ntoko Nleha na waarya, naakhuruwenle vatakwarikhwani khupacerya wiisuupulula Mmansaya wa Moise, toko. Moise khwira...

Moosuwela moota waakhalanny’ahu nisomi ohiyu ule, moota okathi Yesu waary’awe muumu elapo ya vathi, Owo iirale, “Ahe, Moise ahinatthi okhala, MIYO KOOKHALA.” Ole aari Yesu vamwiiwani waavarela, mwa Nripu na Moore. Ti Yesu, olelo, mmosaru.

Ni Owo aahiisuupulula Mmansawe mwa Nripu na Moore, vano Moise khukhalana musuwelelo. Owo onrowa wEjitu. Owo

onlaley a Ehapari yoreera, mihupi sooreera, ni ithoonyeryo ni sootikiniha saanimutthara. Munniiwa saana? Etthu emosaru olelo.

¹³³ Kahi yeeyo paahi, masi okathi aHeperi ale akhumaly'aya, yeetta Mowaaryani, awo yaahooliwa ni Nripu nenlo na Mooro. Nto Bibilia ohimmye wira "Muhimuttehhatthe Muluku."

¹³⁴ Nwehe ela. Mukihiye kisome.

Vanihimmw'aya wira, Olelo nyuwo...mwaiwa nsu nawe, muhuumihe murima anyu, (Nsu Nawe naalavulaka ni murim'anyu.) ntoko saapaciw'awe. (Okathi wampacaly'aya Owo.)

Nwiriyan.

Tani, yaamwiiwale, khumpaca: . . .

¹³⁵ Akavi ansuwela wira aIsarayeli yaahimpaca Muluku ni ohaamini waya? Awo yaahaapa, awo, voomalela. Muluku khurowa weiwe. Nto okathi awo waaruuly'aya . . . Etthu yoopacerya, arookela mmukattyamihoni.

Va naari Nripu na Mooro vasulu vaya. Nkisuwenle sinto othene aya yaahoonan Nenlo, wala nnari. Mano, Moise aahoonan. Nto Nlo naari vasulu vaya, awo yaaniweha Nlo. Nto okathi akhuruwenly'aya . . . Nihimye wira khayoonale, nkisuwenle nkham yaahoonan wala nnari. Nlo naarowa ohoolo waya. Bibilia ohimmye wira Nlo naari vaavale.

¹³⁶ Ohimmye wira, "Ettheneeri yaarowa ohoolo wa asuweli." Khaavo oonale Eyo woohikhala asuweli. Eyo yaavira vasulu va khula nweheryo wa ittheneeri. Awo yaalikela okathi ni ittheneeri. Khaavo oonale Eyo woohikhala asuweli. Yaari wira awo yoonase, nto asuweli ti yaaveleeliheriwe Ettheneeri.

¹³⁷ Nto Nripu na Mooro aaveleeliheriwe Moise, ni Moise aaveleeliheriwe aana a Isarayeli. Ni awo yaahaana omutthara Moise. Awo yaawerya omoona Moise, ni Moise oona Waarya.

Awo yaahirowa. Nto awo yaamurowa. Nto erowaka siisaale, yaahiphiya Ophareya Yooxeerya. Nto, oh, awo—awo yaahoonan ithoonyeryo iye sothene sa miiriirya ni itthu saakhumelela awo nlelo ery'ene mu—muttetthe wa khalayi wa wEjitu, masi vakhumaly'aya iwe mmukwahani mwaya, emalakaruru orukunxa murima ni okumihiwa. Vano, naanaanoru, awo yaahikela mmukattyamihoni.

¹³⁸ Muluku omusivela wookelihani mmukattyamihoni. Owo onnimusivela ohela mukattyamiho ni owoonani etthu enrow'anyu wira mwaha wa yoowo. Tivo Owo aaheemexa Ephareya Yooxeerya, nto naanaanoru, aahaakuxa yeettaka mpakha nipuro nla, vano khimuruma Farawo waatthara ottuli. Munnoonan moota Muluku onimusivel'awe wira yeeyo? Owo omusivela wooniherya owerya Wawe ni mphento. Owo Mulukuu, ni Owo onnimusivela tu owooniheryani wira Owo ti Pani. Amen.

Nto mulattu ene t'ula, olelo, atthu aniira, "Oh, mahiku awo aavira." Nnari. Vanweryaneya sayi Muluku wiisooniherya Mmansawe, muxuttihiwe-ene etthu ntoko eyo? Masi Muluku omusivela wiisooniherya Mwaneene.

¹³⁹ Va anrwa aana a Isarayeli, yeettaka Mowaaryani. Moise, orye-ene ohoolo waya. Awo yaari vale. "Nrowe. *Ela* t'ephiro. Muluku onimwiihana. Hiyo nnookhuma. Ninrowa muttetthe wa natiri."

"Oh, aleluya!" Awo othene yaari vale, ekhuwelaka, etuphaka, evirihaka okathi wooreera, moosuwela. Nto naanaanoru, awo yaahiweha ottuli khwira, "Oh, exeeni nttthupi nle?"

¹⁴⁰ Mmosa aya khuwela vamwaako, khwira, "Oh, oh! Mai, mai! T'anakhotto a Farawo."

¹⁴¹ Muluku khwira, "Muntuthuwelani? Khimwaaminni ele Miyo yiiraly'aka iwe? Munvelavelela-ni? Munikikhaliherya-ni oonanariwa?"

¹⁴² Vaphiyaly'aya iwe, Moise aahirowa khulapela wa Muluku. Muluku khutthukula Ephareya Yooxeerya vano awo khulapuwa; khunwalela nwanani. Ti siiso Muluku oniir'awe. Muhituthuwe. Muhikhale othene ootannyaseya. Muhikhale oovela-vela. Munompaca Muluku.

¹⁴³ Vano Owo iirale exeeni? Enkhala ntoko wira, "Ahe, naahehereriwa vancipale; attottopeliwe Muluku, noovira. Khaninrowa-tho okhalana. Ninrowa neettaka nirowaka muttetthe wa natiri." Nto Owo aahiweettiherya mpakha mothakoni, memmo mwahaakhanle hata maasi. Mwaaniwerya otthokelela? Muluku, ni Awawe—n'atthu Awe ooreerihiwa, oowaarya aaweettihenrye iwe mpakha muntaphani *mu*; vano khwaakumiha muntaphani mme, vano khuweettiherya nno weiwo ohikhanle maasi. Okathi Owo aawery'awe waaroiha ephiro emosa waakhanle maasi. Vano, Owo aaniwerya opaka muratthi, ephiro yothene, Owo aatthunne-ru. Owo aaniwerya opwexakasa khula mwaako okhala otthapa, akhoowiheryaka maasi osulu imeeturu muloko ni thanu, Owo aatthunne-ru. Vekeekhai, Owo aaniwerya. Masi Owo airale siiso, yaamukhala yookhweyaxa. Oh, okisivela! Nttottopeliwe Nsina n'Apwiya.

¹⁴⁴ "Xeeni Muluku akelaka ohiyererya *ela* wiiraneya, Munna Branham? Xeeni Muluku . . .?"

Muluku t'oniira. Mmuhiye Owo mmansawe. Muroweke mweettaka paahi. Owo mwaha wa Muluku. "Mavalo a naxariya aneettiheriwa n'Apwiya." Ayo, mulopwana. Envirikana exeeni?

¹⁴⁵ "Wookipweteya musurukhu aka wothene, Munna Branham." Ahe, attottopeliwe Muluku, khula enamuna.

¹⁴⁶ "Oh, kihira *ela*, ni yookhumelela *ela*, eyuupuru yoopwanyula emp'aka."

147 Attottopeliwe Muluku, khula enamuna. “Apwiya ti yaakivahale, Apwiya t’akuxale, nttottopeliwe Nsina n’Apwiya.” Mutthikele mweettaka murowaka tu. Yothene ti ovuwa wa Muluku. Muluku onnisuwela eniir’awe.

Akina eviraka mmaasini, akina eviraka
moohuruwelani,
Akina yeereriwaka vootepa, masi othene
nivraka Mphomeni.

148 Ti siiso Owo onaahool’awe. Ti yeeyo. Oh, wulu! Kinoona ntoko kaamuwerya omaala kikhuwele. Ti siiso Owo onaahol’awe an’Awe oophentiwa. Oh, munniwerya woona...? Vano, miyo nkihiyo ka napisikoloxiya, masi munniwerya woona Eroho yeele yoomaaleleya esaryaka mpaani mu? Ankhi vaakhanle wira maitho ahu yaamutthukuwa naanaano va, n’uweha ele yeemenle muxirini mu, ni munvireloni mu?

149 Oh, Elisewu, voosiisu umosa, okathi mmirav’ole waary’awe oohona ntoko owo saawery’awe okhala, owo iirale, “Nkaawehehi aSiria ale iwe.”

Khwira, “Masi aakhala anci-ene ni hiyo.”

Khwira, “Nkinimoona hata mutthu.”

Khwira, “Pwiya, mutthukule maitho a mmirav’owo.”

150 Owo khimuwehaweha profet’ole, mapuro othene vale, miyaako saavarela Mooro, ni ikhavalalo sa Mooro, ni ikaaro sa Mooro. Owo aahikupali nto.

151 Owo khwira, “Ninookhuma naapwexe maitho.” Awo yaahikhalana woona waya vooloka ntoko saatonko aya okhalana, masi yaari oohona wa yoowo. Khwira, “Nyuwu othene munimwaavya Eliya?”

Khwira, “Ayo.”

152 Khwira, “Nrowe, kinoowoonihani nipuro nry’awe.” Nto aari yoowo, aahoolaka. Awo khiyaasuwela.

153 Ti siiso siry’aya olelo. Kristu ori vaava. Eroho Yowarya eri vaava, evaraka itthu Eyo envar’aya kweekwe, nave olumwenku ori woohona Eyo. Awo khansuwela Eyo. “Oh, miyo—miyo nkinsuwela Eyo. Pastore aka . . .” Oh, atthu oohaawa oolamwa! Munnoona enihimy’aka? Awo ari oohona Eyo. Awo khansuwela Eyo. Muluku t’onihoolela.

154 Vano, awo yaahiphya, Mothakoni m’oSini, khiyaakhanle maasi iwe. Muluku aahivaherya sothene. Oh, vano yaahiphwanya nthiya na maasi, awo khwira, “Ala va.” Nave khiyaawenrye olawiha. Oh, yaari oowoopiha. Wulu, yaari—yaari ootepa ovikana ipursentu emiya ya esooifiri. Moone, ntoko mooce oowunnta, moosuwela. “Oh, wulu! Yaari oowoopiha.” Yaari eveneno. Vano, wihaniwa Mothakoni m’oSini. Miri sinci-ene

sa makutthi sinninnuwa iwe, nto v'ephattuveloni waari nipuro miri iya sannuw'aya-vo. Vano Moise khwira, "Muhi . . ."

155 Muluku iirale, "Xeeni awo? Xeeni awo? Awo anikipacelani Miyo? Ahe, vakhala wira kihira *yeeyo* ottuli iwe, nkikhanle wiiraka etthu wa mwah'ola?"

156 Vakhala wira Owo ohookumihani mw'ereetani, Owo khonwerya wookumihani mw'ekina? Owo ohookumihani mmukattiyamihoni, khonwerya wookumihani mukina? Attottopeliwe Muluku! Vakhala wira Owo ookikumihama mutampini, onniwerya okikumihama mmahiye. Owo Mulukuu. Envirikana exeenii? Mukeleleke ohoolo paahi, mukhale munwehaka Yoowo.

157 Khwira, "Vakhala wira Miyo kaahitthuka Ephareya Yooxerya iwe, khwaapwiniha atthu a wEjitu, nkikhanle wiiraka etthu mwaha wa maasi ala? Munikiviruwihela-ni? Oh, ohaamini wanyu! Nyuwo munookipaca n'ukinanariha, mwaha wo ohaamini."

158 Vano nuulumo ninrumeeliwa va, "Etampi," yaahimpaca. Yaakhalihale. . . Etthu yiireny'aya, awo khiyaaminni. Awo khiyaakhumale n'uttikha ipale, vano, ni itthu siiso. Awo khiyeettanne mwaara a mutthu mukina, n'ukhuma orowa wootha. Kahi yeeyo yiir'aya. Masi, eyo kehiyo etampi, opacerya wene.

159 Okhala muraruwaka kehiyo etampi. Onvura sikaro, omulya soona, ohapaliwa, omuttikha cuuku, oveeha, olapha, ni sikina, khashihiyo etampi. Iyo ti mikhalelo so ohaamini. Muniira eyo okhala wira mwa mulipa-oohaamini. Mwakhala mulipa-oowaamini, khamuniira eyo. Mwaha wa yeeyo Yesu iiraly'awe, "Ole oniiwa Masu Aka ni *onimwaamini* Ole okirumme, ookhalana Ekumi ehinimala." Kahi *onihimya* wira onnaamini, masi onaamini vekeekhai! Eyo vo. Eyo enookumihama eyooniheryo anyu yoopacerya yothene. Munnona? Vano, eyo vo.

Kahi, "Ole oniiwa Masu Aka ni onikhuwela." Kahi, "Ole oniiwa Masu Aka ni onlavula ilavulelo." Kahi, "Ole oniiwa Masu Aka ni orina ephome mmatatani wala wiitho wawe," wala etthu ekina. Kahi yeeyo.

"Ole oniiwa Masu Aka ni onimwaamini Ole okirumme, ookhalana Ekumi Ehinimala, ni khonvira Molamuliwani, masi oovira mookhwaani khuphwanya Ekumi."

160 Etampi exeenii? Ohaamini. Etthu yaamukhaani pooti okhumelela, ohiya orowela Soolempwa n'usuwela yaari ekeekhai wala nnari, "Oh," muniira, "Miyo ka. . . Nnari! Moone, vale, munoorowa. Kinootthikela kikhalaka muPrespiteriyaano siisa siry'aka, moone." Mukeleleke ohoolo, ohoona, nto munimpaca Muluku.

161 Okathi Muluku oniir'awe etthu, Owo onwehererya wira nloko naakhele Yeeyo. Masi, ohiya vo, "Moosuwela, ahe, miyo nkinsuwela Ele." Munnona? Owo onwehererya wira atthu animwiiwa saana. Nyuwo mwacaliwaru voophiyerya, mukilaathi ni Soolempwa. Murowe nto musome saana Seiyo, oratta-ene, nto moone vakhala wira yookhumelela, vakhala wira yoochimwa khalayi ene wira enookhumelela, ni siiso. Vano munoovara. Amen.

162 Vano nwehe.

Tivo vani...Olelo nyuwo...mwaiwa nsu nawe, muhuumihe murima anyu, ntoko waapaciw'awe, okathi Muluku opaciw'awe n'awo, moone.

Tani ale, yaiwale, yaiwale ehapari ya Moise olaleiwa, khumpaca: kahiyo othene ale yaakumihiwe wEjitu ni Moise.

163 Akavi ansuwela atthu akavi yoopoliwe a nikhuru nlo n'keekhai naakhumme? Akavi? [Ookhala oniira, "Anli."—Mol.] Anli, ti yeeyo. Akavi ansuwela masin'aya? ["Kalebi ni Yoxuwa."] Ti yeeyo. Kalebi ni Yoxuwa, anli yaawo paahi, w'ale yaakhumme imilyawu piili n'itthu.

164 Nwiriyaane ela. "Masi owo . . ." Versiikulu 17 vano.

Masi t'ani owo aananariw'awe ni yaawo mpakha miyaakha miloko mixexe, mwaha wo ohaamini. Khiwaari n'ale yiirale etampi, yahaaminni . . . ?

165 Mukuxe etaphulelo ya moolumo musuwele etthu enihimya *etampi*. Mukuxe etaphulelo ya moolumo a Bibilia. Onkhala ohaamini. *Ohaamini "etampii."* "Ole ohinaamini oohukhummwa," Yohani Oowaarya 4, moone, "oohukhummwa."

. . . irutthu saya khukhwa mothakoni?

Nave-tho t'ani owo aalaphenlyawe wira awo khiyaarowa ovolowa momumulani mwawe, . . .

166 Ohaamini wanyu! Oh, nkinrowa okelela ekapiitulu aka. Masi, nwehe, ti yoowo okhanle mulattu n'ilapo ela, olelo. Ithonyeryo ni sootikiniha soovira elapo ela yothena. Ewo aniira exeeni? Anrukunuwela ettuli voohihyererya. Nto Owo irale, "Miyo kinoolapha wira nkinaahiya evolowaka Muttetth'ole awo apaceny'aya orowa."

167 Mulattu xeeni ni ikereja iya suulupale olelo? Ohaamini waya woompaca Muluku. Aleluya! Owo onniwerya ni maluku ala waatatuxa aana a Abrahamu. Owo oophavela waavaha Ehapari yooreera, vano awo ahuumiha mirima saya. Awo aroopaka makhuru aya ookokhorela mmansaya, khupaka miromolelo sikhaani, "Nto hiyo ninaamini *ila* nave hat'etthu ekina," vano Muluku khaakhanle okelaka. Awo ari yayi olelo? Ari epante emosa.

168 Nikhuru naamukhaani, nooromeleya na Muluku ninookelela ohoolo, ni ithoonyeryo ni sootikiniha. Owo onaahela mowehereriwani. “Khula mwaana onrwa wa Muluku ohaana othokosiwa ni wehereriwa,” oxuttihiwa ntoko mwaana.

169 Etthu yoopacerya yaamukhaani ekhumelenle, “Oh, ahe, khino khiimo-mo etthu Mmo, khula enamuna.” Nyuwo mwa mwaana oophwanyiswa, nave khamuhiyo mwaana a Muluku.

170 Maana mwaana a Muluku ti Osuulu w’Abrahamu, oniihana itthu iyo sahaakhanle, ntoko wira saahikhala, “Muluku ohimnye siiso,” nto onoothikela akelelaka ohoolo. Amen. Hata wira enihimya-ni, wala etthu p’itthu yoovirikana, awo ankhala akelelaka ohoolo, khula enamuna. “Muluku ohimnye siiso.”

171 Owo aahimulipelela mwaan’ole miyaakha miloko miili ni mithanu, voochicala moota xeeni yaary’aya yoovirikana. Ni owo aahiivalaaniha n’atthu ale oohaamini, amen, wira awerye waamini. Oh, wulu! Kinnoona okhala natiini.

Nkupuwelani yeeyo. Muhaana wiivalaaniha nikano nlo na molumwengkuni, “Ah, mahiku ale a miiriirya aavira. Khiivo etthu ntoko Eyo. Iwo onamathipelela.” Mwiivalaanihe.

172 Bibilia ohimnye wira, “Mukhume eriyari aya, mwiivalaanihe, anihimya t’Apwiya, nto Miyo kinoowaakhelani.” Moota enireer’aya! “Miyo kinoowaakhelani,” numala wiivalaaniha. “Munookhala an’Aka, Miyo kinookhala Muluku anyu.” Mwiivalaanihe, muhiitthukele muritti n’ale oohaamini. Eyo ekeekhai.

173 Mmiravo onrowa othela, khimuthela mwali ohinaamini; wala mwali ontheliwa ni mmiravo ohinaamini. Muhiire eyo. Nkincala moota xeeni mmirav’owo oreeraly’awe, ni—ni, wala mwali uwo ooreeraly’awe, ni maitho xeeni ale maalupale orin’awe; awo anoolakaseya nihiku nlo. Masi, munna, munep’anyu onoorowa okhala voochimala. Mukasoope etthu eniir’anyu. Mwali uwo aahikhale oowaamini eekeekhai, wala mmiravo oowaamini eekeekhai, muhiitthukele muritti siiso. Mwiivalaanihe eyo. Enimooruuhelani mukattyamiho mphironi.

174 Vano nwiriwane, versiikulu 17.

Masi...t’ani owo...aananariw’awe ni yaawo miyaakha miloko mixexe? khahiyo ale yuirale itampi, irutthu saya khukhwa mothakoni?

...t’ani ale owo aalapheny’awe wira khiyaarowa ovolowa momumulani,...

175 Awo yaahikhuma, masi, yaahoonna miiriirya, masi khiyaakenle mmuttettheni mwa natiri. Nummaru noothanliwa paahi, n’anli, ti yaavolonwe muttetthe wa natiri.

176 Vano Paulo oniira-ni? Owo onlavula n’aKristu vano, “Muhihyererye Ehapari yooreera yeela emosaru, yaalaleiwe iwe, mwa ithoonyeryo ni miiriirya, ni Nripu na Mooro

naanaahoola; okathi itthu iya siniirey'aya-tho, muhimorele epante y'ephiro, mwaha wo ohaamini, muhoveryaka, tthiri irutthu saya saahimora mothakoni."

177 Vano ninoophiyerya, naakuvaka vano. Nwehe saana.

. . . *masi w'ale* yahaakhanle?

Tthiri ninnoona wira awo khiyaawenrye ovolowa mwaha wo ohaamini.

Owo oniihana *etampi* emaara emosa, oniihana *ohaamini* emaara ekina. *Ohaamini* "etampii." "Awo khiyaavolonwe, mwaha wo ohaamini waya."

178 Awo yaahimoona profet'owo, Moise. Awo yaahoono etthu iiraly'awe, yaahoono etthu aahimaly'awe. Yaari Ekeekhaii, khula okathi, yaahikelela ohoolo, Ekeekhai. Nripu na Mooro naanikhumelela ohoolo waya. Awo yaaniweha Nenlo. Awo yaahoono Nenlo.

179 Paulo, atthunaka osuwela saana, ohoolo waya, osuwela saana va, musuwelelo waarin'awe. Munnona? Aphavelaka ohimya musuwelelo, owo aahilikanyiha ni Waataana Wa Khalayi. Owo iirale, "Vano nookela mw'etthu ya naanaano, okathi ula wa vano, mwa Yesu Kristu. Okathi wa khalayi, Apwiya yaanaakhumelela ni maprofeta, masi vano Awo ari mwa Mwan'Aya, Yesu." Munnona? Vano owo khupacerya olikanyiha misuwelelo ni owooniha etthu yaakhumelela, moota ithoonyeryo ni miiriirya, ni sothene, ni iye silempwe.

180 Vano owo ohimnye wira, "Awo khiyaavolonwe, mwaha wo ohaamini waya." Awo khiyaaminni.

181 "Masi vano, hiyo, ninkela ehuhu emosa y'okathi, nto muhumihe murim'anyu. Muhiire ntoko awo siiraly'aya, mahiku yaapacaly'aya, okathi yampacaly'aya Muluku." Awo yiirale sayi? Kahi mwaha wo okhala voochifayi. Mukihiye kootaphuleleni yeela.

182 Nyuwo muniira, "Munna Branham kinnirowa okereja." Ti yooreera. "Nkinatoko wootha kookhalaru." Ti yooreera. "Nkinatoko wiiya. Nkinatoko wira *ela, ele, wala ekina.*" Eyo ti yooreera saana. Sothene iyo ti sooreera. Masi, nlelo kehiyo etampi.

183 Etampi onkhala okathi Muluku oniisoonihery'awe vano nyuwo khuhinaamini Yeeyo, khuhinaiwelela Yeeyo.

184 "Oh," muniira, "ekerej'aka kheniixuttiha Eyo." Vakhalaru wira Bibilia onniixuttiha, ni Muluku onnooniherya, eyo t'itthu ene.

Vano nwehe okathi vakhani paahi. Vano ninrowa opacerya vano etthu emosa, yowiixerya saana-ene. Vano, muhele muupuwelo anyu mpoolosani mwa ekhasako anyu mpakha okhuma.

185 Vano nwehe oratta-ene.

Tivo niikasoopeke, wira, natiri nioromelihiw'ahu wo ovolowa mwawawe . . .

Ya mulopwana, ya muthiyana, iporonoome sa mutthu vano. Exeeni?

. . .hata mutthu a nyuwo ahiphwanyawe ahiphwanelaka.

186 Vano, Paulo omphavela waaleela, ekapiitulu y'ottuli, mwaha wa itthu iya sothene. Masi vano owo omphavela waaleela etthu Eyo ekhanly'aya.

Oh, nookhalana okathi? Miyo. . . Khino vanreerela nilipelele mpakha olelo ohiyu. Vanimooxa, ni ninoorowa okhalana muteko wa mavekelo. Khino vanreerela nilavule olelo ohiyu, okhala wira ela khereere ivitamiina, ivitamiina sa erooho. Nkireerane itthu so wira, ni kihaana muteko oxekuw'ola. "Nrowe. . ."

Tivo niikasoopeke, wira, natiri. . .

187 Vano, awo yaahikhalana natiri a muttethe wa natiri, wEjitu iwe? Nto, okathi, Muluku okhurunw'awe, wira amukhalihe natiri ula ekeekhai. Vano, Muluku aahimuhimeerya Abrahamu, miyaakha imiya imiya sene khalayi, wira Owo aamurowa wira. Yaari Yoolempwa.

188 Yosefe iirale, "Muhikumihe makhuva aka va mpakha murowe muttethe yoowo wa natiri mwakivithe weiwo n'axitiithi aka akina." Okhala wira, owo aanisuwela wira ohihimuwa waanirwa, okathi Yesu ohihimuwaly'awe mw'alipaookhwa, okhala wira aahisuwela wira Yobi aahihimya. Munnona?

189 Khula mmosa wa maprofet'ale yaanisuwela paahi etthu profeta mukina aahimaly'awe, ni aanisuwela wira Eroho aya yaari emosaru. Ni awo yaaniweha. Oh, munna! Oh, eyo yaahaana onittikinya mmukhaleloni mwahu m'olumwenku. Awo yaahihela maitho aya, kahi mwa ele atthu yaahimy'aya, masi ele maprofet'ale yaahimy'aya. Khula mmosa a awo yaaniweha.

190 Abrahamu iirale, "Mukivithe vaava va Yobi ovithi'awe." Khwira, "Sara, kinrowa othuma nipuwa. Ninrowa ovithiwa vaava va."

191 Isakhi aari profeta, numala atith'awe. Khwira, "Nwiriyane. Muhikivithe khula nipuro nikina, kahi wEjitu nno, masi mukikuxe mukiroihe muttethe wa natiri. Mukivithe wenna."

192 Yakope aakhwiye ota wa muttethe wa natiri, masi aahimuhimeerya mwan'awe, aari profeta, khwira, "Moosuwela, ohiyu umosa Nlaikha naahikikwannya mpararini. Okhuma vaavo kinootuthunya. Murwe, muhele ntata nanyu. . ." Oh, ikharari! "Mwan'aka profeta, kihuluvala ni nkinoona. Masi muhele ntata nanyu, yeenyu mukhanly'anyu profeta, muhele

nipuro Nlaikha naahenly'aya ntata Naya, ni mulaphe ni nsina na Muluku a Wirimu wira khamunikivitha wenzo."

193 Attotopeliwe. . Munnoona muupululo wa muroohoni wa Masu? Vano, nuusu n'awo, oophiyaka ntoko ipursento miloko mithanu na mixexe, khiyaasuwela etthu aahimy'awe. Masi owo aanisuwela etthu aahimy'awe. "Muhele matat'anyu a profeta nipuro nla Nlaikha naahenly'aya ntata Naya. Miyo kaari mutthu mmosa, muulupale ooneneva, oowoova ookhomaala. Masi, Owo khukikwannya, nto okhuma vaavo kinikhala ootuthunya. Masi ka mukhulupale okhuma okathi ontuthunyaaka. Okhuma okathi orukunxaly'aka enamuna yo weetta, ka mukhulupale." Ayo. "Muhele matat'anyu va. Mmulaphele Muluku a Wirimu, wira khamunrowa okivitha wenzo." Mwaha wa xeeni? Khaavo mutthu aasuwela etthu aahimy'awe. Yosefe aanisuwela. Owo khwira, "Mukiroihe iwe mwakivithe muttetthe wa natiri." Iwo ti waary'aya. Vekeekhai.

194 Okathi Yosefe okhwiy'awe, miyaakha ohoolo waya, owo iirale, "Muhikivithe wenzo. Masi nwehe makhuv'aka mwaaviraka, okhala wira nihiku nlo munookhuma nno. Nto mwaarowaka, mukuxe makhuv'aka ni nyuwo."

195 Eyo vo. Muhiye olumwenku ohimya etthu antthun'aya, ni wira etthu antthun'aya wira. Nttotopeliwe Nsina n'Apwiya. Mukikhalihe mwa Kristu, kaihaniwa etthu p'itthu, namathipelela, wala santu oophirikeya. Nihiku nlo Owo onimoorwa, nto ale ari mwa Kristu Muluku onimwaaruha ni Yoowo, okathi Owo onrw'awe. Yothene eyo ti ya erooha, Ekeekhai yuupululiwe enkhala vaavo vo, onthuneya muupuwelo wa erooha wira ovare Eyo. Mmumuleke mwa yeeyo, nihiku nothene. Muupuweleke. Hata wira muniira muhirina yolya anyu y'ohiyu, muupuweleke yeeyo.

196 Nto olelo ohiyu, ninrowa ovolowa Momumulani mwAwe, waahanle, noone ele ekhanle natiri ula olelo. Etthu ila exeenii olelo? Vakhala wira Muluku khorina Ela va mBibiliani, ni wooniherya, wira Eyo eri vaava naanaano va, weso ka profeta oowootha. Eyo ekeekhaii voolikana. Masi Eyo eri va. Omumula nno exeenii?

197 Owo ohimnye wira:

Vano, *nrowe . . . niikasoopeke, wira, natiri
niroromelihiw'ahu* wira nivolowe ntoko awo
siiraly'aya, . . .

198 Nto ohaana okhala natiri yoowo mmosaru. Ohaana okhala omumula omosaru. Ohaana okhala Muluku mmosaru. Sihaana okhala ithoonyeryo imosaru. Ehaana okhala etthu emosaru. Masi nrowe nimumule. Vano exeeni Iyo? Apwiya enivahe, olelo ohiyu.

Nuuramaka muru ahu.

199 Apwiya Oottotopeliwa, Ohimala paahi t'unrowa wuupulula itthu suulupale hiyo ninkawan'ahu hoothe. Vakhani. . .

Khareere ale atthomeliwe ohukhummwa. Ntoko Nyuwo sihimaly'anyu Muliivuruni mwa Yuta, wira, "Atthu, a khalayi yatthomeliwe ohukhummwa, yaamukuxa mahala a Muluku ahu n'urukunxa okhaliha itthu soopahuwa." Nto anci-ene olelo annilaleya Ehapari yooreera, mahala a Muluku, erukunxaka Yaawo wa enamuna yo ophwanya musurukhu, ekhalanaka ekereja yuulupale ni anci-ene mwa exikola ya Ttiminku, ekuxaka mahala a Muluku n'urukunxa okhaliha itthu soopahuwa. Vano olumwenku ti woohona, ni onoorowa ntoko ikuluwe sihinoona. Awo khansuwela saana.

200 O Muluku, munitthukule maiwelo. Muhihiye maiwelo ahu okhala ntoko aana a olumwenk'ula. Maana Nyuwo moohimya mwa Masu Anyu, wira, "Aana a molumwenkuni mu t'osuwelexa waavikana aana a moWaaryani." Wopaceryani yaari siiso, "aana a Kayini" yaari anamaxuttiha a siyensiya aalupale. Awo yaahikhala anamasomiha aalupale. Awo yaahikhala aratti a muteko wa ikaruma. Awo yaanirowa ekelelaka ohoolo, anatiini saana, masi yaahihukhummwa khusamihiwa w'olamuliwani. Vano irutthu saya saahiphempa mmaasini, ni minepa saya saahirowa omooroni.

201 Vano Yesu aahirowa khulavula ni yaawo, okathi Owo aakhwiw'awe. "Nto aahirowa omooroni khulaleerya minepa s'ari mootthukweliwani, sahaarukunxale murima m'ovilelani, mahiku a Nowe," enihimya Yoolempwaa. Vano Muluku, okathi Owo eemenly'awe elapo ya vathi, Owo iirale, "Ntoko saary'aya mahiku a Nowe, siiso-tho vanookhala orwa wa Mwaana a mutthu."

202 Masi hiyo ninniweha, "nihimo nto na Sethi," atthu oowiiyeviha, atthu eekeekhai a Muluku, ehisuwelaka vanci-ene itthu sa molumwenkuni, ehicalaka hat'etthu sa itthu sa molumwenkuni, masi yaahihiya miritti sothene khumwaamini Muluku, vano khukhala maprofeta ni atthu aalupale Momweneni. Okathi akina, olumwenku mukina wa etiini, waathey'aya, waanyemulas'aya. Masi waahirwa okathi osarya wa maasi ni olamuliwa saaruuly'aya.

203 Yaari siiso orwa wa Yesu Kristu. Moota awo yaamuthey'aya ni omunyemulasa Owo, okathi waarin'aya etiini aya aneene ni ikereja saya suulupale. Masi awo yaatheya Ettheneeri Y'oxaka, ni awo yaamutheya Yoowo. Masi nnakhala vo awo yaahilamuliwa. Nto okathi waatyanw'aya khurowa oYerusalemu, awo yaahaakhuura an'aya iwe, mwaha w'ovoliwa etala, vano ephome aya yaahiyeeheya mmikhorani mw'ephiro okathi waapahiwaaya muttetthe ni empa y'olompa, vano minepa saya khurowa omooroni.

²⁰⁴ Pwiya, hiyo nri va emaara ekina, ya neeraru. Ola okathi w'ekumi. Tthaaru ti nummaru n'ekumi. Nto hiyo nri va, oolikana mwaha wa Okuxiwa.

Ekereja enookelela ohoolo; olumwenku muulupale wa siyensiya; ikereja olelo sirine-ene atthu anaamini ehoveryaka. Ikonto miloko sene arina masin'aya muliivuruni, ayo, imilyawu, nto yaarowa otheya Ehapari yooreera, ni ohimya, wira, "Awo t'osoma. Awo khansuwela."

Khino ti siiso, Pwiya, masi ele ennihaleela moosomani, Nyuwo munnimaleliha mwa mahala mwaha wo oruma Nlaikha Nanyu na Waarya, nooniheryaka owerya Waya, nilipiheryaka Masu w'ale ari oohaawa ni oohisoma ntoko hiyo. Masi hiyo ninnoophentani mwaha wa yeela, okhala wira ala mahala a Muluku aniira, ni noosuwela wira nooyariwa. Ni khanihiyo oophenteya, nnakhala. Hiyo n'atthu oohiphenteya hata vakhani. Masi Nyuwo, ni mahala, muhookola ntata Nanyu n'omoriwa ikharari ni mootthukula maitho ahu, ntoko Yesu onivekelenly'awe; ntoko Eliya saamwiireny'awe Gehazi, okathi waaweh'awe wira oone vale vaamurukurerya. Nto olelo maitho ahu aatthukuwa, ni ninnoona itthu sa Muluku, ni noosuwela wira nineetta nirowaka okathi wookiserya; okathi mahiku a Amalapo ahanly'aya omala, nto Owo onoorowa waakuxa atthu mwaha wa Nsina Nawe. Munitthuniherye niheliwe memmo, Pwiya, ninnivekela niyevihaka. Ninvekela wira Nyuwo munivahe.

²⁰⁵ Munireerihe. Mureerihe muthukuman'ola mwaamukhaani voosiis'ula. Awo t'a inamuna soohiyana-hiyana sa itiini ni iyaaminelo, masi mwaahale epanthe aya olelo, Muluku. Ni wira ewehe elipelaka oKalvario, yiire, "Muluku, mukuupe ni mukipake. Miyo kiri ntoko e..." Profeta oohimya wira aahrowa owannyawe mulipa-oowuupa, wira apwexakasiwe uupiwe vasya. Munuupe ni munipake ntoko mukhalelo Muluku onnitthunel'awe. Khivancala vakhala wira nihaana okhala ntthatto na vathi Mpaani mw'Apwiya. Kaamwamputi okhala ntthatto nenlo ohikhanle okhala muheemani s'alipa-ootakhala. Nto munivahe, Pwiya. Munireerihe vano, ni munikhalihe oowiiyeviha. Muhiye mirima sahu sikhale sootthukuwa, miyuupuwelo sahu sooreerela, wa itthu sa Muluku, maana ninvekela mwa Nsina na Kristu.

²⁰⁶ Nuuramme-ene muru, kaatthuna kisuwele akhala mutthu aarowa otthuna wuupuweliwa ni nuulumo na mavekelo, wa woopowa wa munep'anyu? Mwaamuvenxa ntata, ntoko natampi paahi? Muluku ooreeriheni, mmiravo. Mutthu mukina tho? Muluku ooreeriheni, ottuli iwo, mulopwana. Muluku ooreeriheni, muhano. Mutthu mukina tho onttthuna wuupuweliwa mmavekeloni naanaano va, wa munep'anyu? Muluku ooreeriheni, mulopwana, nvenxale ntata. Ni Muluku ooreeriheni, ni nyuwo va. Vooreerexa. Aamukhala mukina,

nihinatthi omaliha? Kinoona wira ookhala. Muluku ooreeriheni, ottuli iwo, mulopwana, ottuli.

207 Wira, vano nkawehani, kintthuna kookoheni etthu. Nkinthuna wira muupuwele wira mwaha w'etapernakulu ila ekhaani. Nkinthuna wira muupuwele wira mwaha w'okhala atthu ala. Ni Muluku oomoriwa ikharari, muhuupuwele wira mwaha wa Nlaikha n'Apwiya nikumihiwe elatarato Aya vamosa ni miyo, ni miyo. . . ni—ni etthu ya yeeyo, wira yeeyo. O Muluku! Koonakaru siiso, nto, munna, vanniphaveleya miyo okhala waltaari ohiya woovekelani nyuwo. Masi miyo kinihimya ela paahi, kinihimya ela paahi ni Yoolempwa, wira moone wira ela Ekeekhaii. Vaakhanle wira kaamuhimya, nto khukhala yeeyo tu yaakhanle, khunatthikela kirowaka ntoko khula mulaleyi mukina wala etthu ekina, wala ekina, ahe, yaamukhala yoovirikana. Masi munnoona etthu ene, Muluku onoorukunuwa ni wooniherya wira eyo Ekeekhaii. Munnona? Ti yeeyo enikhaliha y'ekeekhai, ti Muluku onlipiherya. Vano nto, kahi yeeyo paahi, masi Masu Awe annihimya wira Owo onimwiira. Va Owo onniira.

208 Vano nyuwo mwaahikhale mwa ekhweeli, murim'anyu khokhanle oratta-ene ni Muluku, mwaamutthuna ovenxa ntata nanyu? Mwiire, "Mukivekelele." Vaareera, vaavo mury'anyu. Matata oophiyaka mathanu na mararu wala muloko aavenxiwa, etthunaka omoreliwa ikharari munep'aya. Muuramme-ene muru, vano nvekele. Muupuwele, ti nyuwo murina orukunxa murima. Miyo kinimoovekelelani paahi, wira Muluku amoriwe ikharari. Masi ole altaarii, Muluku ohooruuhanu voopuroni mmuruni mwanyu; ole altaarii. Hiyo ninnaamini orwa waltaari, vekeekhai, masi eyo kheni—eyo kheni. . . Ti yooreera. Masi altaarii anyu eekeekhai ti vale Muluku oophwannyaaweni. Nto Owo oophwanniyeni vaavo vo mukilanth'anyu. Owo t'okhanle altaari anyu.

209 Vano mwiire, "Muluku, mukimorele ikharari miyo, natampi. Nto okhuma olelo mpakha ohoole, Nyuwo mwakikhaliherya, kinaamukhalaka mwaha wa Nyuwo. Kini—kinimoorumeelani Nyuwo. Nkincala etthu mutthu ti mutthu onihimy'awe, miyo kinookhuma, voosiis'ula. Miyo kinvekela va, ni Nyuwo mukumihe erooho ela ya khalayi yoohikasooopa mwa miyo. Mukumihe oviruwa nno mwa miyo. Koosuwela wira nkikhanle wiiraka siiso khukhala oratta-ene ni Muluku. Ni kookhalana onyokha mmurimani mwaka. Ka nanrima. Kookhalana etakhalelo. Kookhalana *ela, ele*. Mukumihe, Muluku. Nkinthuna okhala siiso. Mukikhalihe oomaala, ni oowiiyeviha, ni owiisumaaliha. Mukikhalihe ooreera murima. Mukikhalihe mutthu kaarowa waaruuha akina wa Nyuwo. Mukitthuniherye owiirelani etthu Nyuwo wira kooniherye oxukhuru mw'ekumi aka." Nlo ti nivekelo munvekel'anyu vano, okathi onvekel'ahu vamosa.

²¹⁰ Tithi a Wirimu, awo t'Awinyu. Awo ti mihokorokho sa Mutthaka voosiis'ula. Awo aavenxa ntata. Yookhala ethhu ewiirihale wira siiso. Awo—awo aavirikanya malamulo a elemelelo okathi avenxaly'aya matata. Yaahikhala erooho mwa yaawo yiirale ethanlelo. Awo aavenxa matata, wira aamukupali Mpattuxa Yoowo aapakale.

²¹¹ Vano, Tithi a Wirimu, kinvekela wira Nyuwo mwaareerihe, ni mwaavahe Ekumi Ehinimala, naanaano va. Khiivo hat'etthu kaakhanly'aka wira; owiihanela waltaari, waahela esaala ekina, ovara muteko wothene. E—entthunaneya Nyuwo wira, Pwiya. Khaninwerya wira—tho ehikhanle olaleya Masu. Nyuwo moohimya, “Waamini onrwa mwaha wo wiiwa, wiiwa Masu, Masu a Muluku.” Vano, hiyo noolaleya Masu, ni awo aavenxa matat'aya, wira ahaamini yaawo. Vano mwaavahe Ekumi ehinimala, okhala wira Nyuwo moohimya wira mwaamwiira. Vakhalaru wira yaari a xariya evenxaka matat'aya, awo anookhuma mpaani mu voosiis'ula, muKristu oosivela, owiisumaaliha, owiiyeviha, okhala wira Nyuwo moohimya. Ni Masu Anyu khanivonya. Kinvekela mwa Nsina na Yesu Kristu. Amen.

Vano kinoowehaweha, kilipelelaka, ni
kiphavelaka,
Epoom'ele yowaarya, Yohani oonaly'awe
ekhuruwaka.

Epoom'ele yowaarya . . .

Mukokhorele vano.

. . . epooma yootteela ntoko nluku noowaarya,
Kookhalana empa, pankwe ni ekhara;
Vano kinoowehaweha, kilipelelaka ni
kiphavelaka,
Epoom'ele yowaarya, Yohani oonaly'awe
ekhuruwaka.

²¹² Nyuwo khamunimphenta Yoowo? Mutthaka woomala, vano. Nno okokhorela. Hiyo khaninrwa okereja wiiwa mutthaka paahi. Ninrweela okokhorela. Mmuliyaale mutthu owaattamenleni tu. Mmukokhorele Yoowo paahi. Oh, moota ereeraly'aya! Moota ery'aya yooreerexa! Mmuleele Yoowo paahi mw'awinyu . . . Khamurina omuleela vancipale. Mmuleele Yoowo mmurimani mwanu paahi, “Miyo kinnoophentani, Pwiya. Mukilevelele etampi aka.” Oh wulu!

. . . Epooma yootteela ntoko nluku noowaarya,
Kookhalana empa, pankwe ni ekhara;
Vano kinoowehaweha, kilipelelaka ni
kiphavelaka,
Epoom'ele yootteela, Yohani oonaly'awe
ekhuruwaka.

²¹³ Muluku Tith'ahu, munaakhele. Hiyo ninoolipelela, okathi onwiryani'ahu Masu, nilipelelaka. "Mirima sahu sinnivoliwa ntthona ni Nyuwo, ntoko etthove eninlel'aya muro wa maasi. Minepa sahu sinnivoliwa ntthona ni Nyuwo, O Muluku." Niphavelaka ni nilipelelaka, nilipelelaka okathi ule Yesu onrw'awe, nilipelelaka okathi onrow'ahu wiihaneliwa wirimu. Kahi wira nakhale ohoolo wa Mphuki wolamuliwani; eyo yoovira. Hiyo nihookhwa wa itthu sa molumwenkuni, ni noovolowa mwa Kristu, nto Owo ookuxa olamuliwa wahu. Owo ti Mulapeli ahu vano, veehiceni va exariya. Mulapeli ahu oottotopeliwa, yoowo, mwa olapa wahu, Owo onlapela mwaha ahu mpakha vansuwel'ahu wira hiyo khanimphwanela. Ntoko munna mwamuthiyana oophenteya voosiis'ula, ohimaly'awe mwa onamoon'awe, ni ahelaka-mo isentaavo sawe, "Okhuma okathi orwiiy'aka va koosuwela wira kuhiyo owaarya waka, ti owaarya wa Muluku."

²¹⁴ Vekeekhai, Pwiya, hiyo ninnaaxuttiha atthu, khiivo etthu yooreera mwa mutthu, hata etthu emosa. "Mutthu ti pani Nyuwo mukhanly'anyu ocaliwaka ni yoowo?" Masi ti mahala a Muluku anirwenle. Ni hiyo ninroromela paahi ophwanela Wawe, kahi wawihu. Ni hiyo ninnookokhorelani Nyuwo, Muluku Ootepexa Waarya, mwaha w'oreera Wanyu murima, onihela Momweneni mw'Anyu wuulupale, mwa itthokiheryo Sanyu suulupale. Hiyo ninniwaakhelani mmurimani mwahu, mwaha wo waamini. Nto ni mahala, ninnaamini wira Nyuwo moonivaha wa ovuwa wa Muluku, wa muteko wa Muluku.

²¹⁵ Vano, Pwiya, mwaavonihe aretta okathi anrw'aya wira evekeleliwe, voosiis'ula. Mwaavahe ohakalala iwo, awo amphavel'aya okhala akumi. Mwaahiye esuwele wira muxankih'ola, mwaamukhaani onivira oheliwe mwa yaawo, okathi vakhani wo wehereriwa. Muluku onnisuwela sothene sa yoowo. Owo oirenle wira oone etthu naarow'ahu wira mwaha wa yoowo. Moota Muluku. . . Awo yeette nivalo ekelaka ohoolo ni yinlele mutek'owo omalihiwe! Nyuwo. . . Wira awo ehoopaceni, etthimakelaka *nno* ni *iwe*, ni *evolowaka* ni *ekhumaka*, "Ahe, miyo nkinsuwela *ela, ele*."

²¹⁶ Pwiya, awo ekuxe mweettelo woolikana, yiire, "Pwiya, Nyuwo mwaari Ole mukooponle. Nyuwo mwaari Ole okiirenle itthu iya. Kinniwaaminini, ni kinnoororomelani Nyuwo, olelo." Nto kinvekela wira Nyuwo mwaavahe atthu ala, mwa Nsina na Kristu. Amen.



AHEPERI, EKAPIITULU YA NEERARU EMK57-0901M
(Hebrews, Chapter Three)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeettaka 1 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org